

四庫全書

集部

欽定四庫全書

集部  
陶菴全集卷三

詳校官編修臣錢樾

侍讀臣孫球覆勘

總校官知縣臣楊懋珩

校對官中書臣黃晃

謄錄監生臣龍錫

欽定四庫全書

陶菴全集卷三

論

科舉論序

三代以後設科取士之法莫善於漢之賢良方正莫不善於唐之詩賦取士宋初稍沿唐制及安石變法始專用經義而詩賦之科終宋世數

明 黃淳耀 撰

起數廢要其所謂經義者特安石之新說而已  
雖紹興以後王學稍衰而河南荆舒對立為兩  
則學者猶多駢駁也至我明高皇帝釐正經術  
宗濂洛之義理存先漢之注疏使士子有所據  
依于是釋老莊列影響依附之言廓然盡矣且  
其制有論有詔詰表判有時務策三場並重而  
科舉之外有辟舉有歲貢三途並用故我國初  
得人之盛雄視西京士子之應科目者無上書

覓舉之弊無羣聚京師之擾無請謁舉主之隙  
規制之善漢唐宋皆不及也自憲皇帝以後所  
謂三途者遂廢其二而科舉始獨重矣近則三  
場之所重者止於七義七義之所重者止於三  
義而科舉之法弊矣或者議欲廢之或又以為  
國家三百年來文武忠孝之士皆出是科但當  
遵行無變余竊以為二者之論皆非也廢科舉  
者其意一出於薦辟而不得其法其弊更有甚

于科舉也然科舉之法則誠弊矣易曰通其變  
使民不倦今誠少變科舉之法參用辟舉歲貢  
之法何為不可夫天之有象緯一定者也然治  
厯者非隨時修改則數十年而一差況人才氣  
運之相推如江河而未有極乎使吾變之而畔  
違乎祖制無變可也其大者適與我祖制同而  
其小者質之立法之意而無謬何為不可愚不  
自揆作為科舉論三篇以俟知言者折衷焉

科舉論上

國家之以經義取士也將以明經乎抑以晦經乎其出於明經也必矣然吾觀今之經義則其弊適足以晦經夫晦經非設科意也蓋宋人之有帖書墨義也離其前後之文以驗其記誦其事至陋才士恥為之至一變而為經義則剖析義理不徒記誦矣故當時名之曰大義而我國朝因之蓋其著為功令者不過以觀士之能通經術與否而初非以此困之使出於不可知之途也今

取洪永間經義讀之言約理明渾厚朴直亦何嘗剝剝  
剝裂而為無根之辭乎起昔人于今日而為其剝剝剝  
裂者將或有所不能進今人于洪永而為其渾厚朴直  
者歲月之間可至矣惟昔之為經義也易而上下之好  
尚出于一故士子氣完力餘得以究心于天下之實學  
惟今之為經義也難故士子勞精神窮日夜以求工於  
無益之空言而不可施于用且為之者益多則其趨益  
亂趨益亂則上之人無所據以定其取舍而其途益惑



趨亂而遂惑則士子益咎其文之不工而無暇於實學  
實學荒則其不遇者文質無所底而其遇者以貪冒為  
得計以虛恥為迂疎且盡舉其所以徼幸于科名者而  
推之于政事之間而科舉之法遂大敝夫科舉之法敝  
則郡縣無循吏疆場無能臣欲寇盜平而四裔服不可  
得也然而科舉之敝所以至此者無他上之人不知驅  
士子以出于實學而聽其所趨反相率而從之故也嗟  
夫如是而猶以科舉之設為明經者其亦不思而已矣

吾故以為將驅天下之士而使之出于實學則必宜復  
祖制五篇之法于七義中減其二道而閱卷必三場通  
較不以一場為去取經義取辨析義理而已浮華者務  
在必黜則士子亦安肯故為其難以出于必不利之途  
哉論則求其馳騁經史表則求其駢麗四六判則求其  
明習法令策則求其曉暢治道此雖與經義等為空言  
然工拙易辨也宋人既立經義尚為宏詞科以收詞賦  
之士以繼古者之制科今獨不可推其意于二三場哉

昔黃庭堅在貢院四十六日九人半取一人今主司鑒  
裁之明或不如古而以數十人取一人又程之于數日  
之中日力無餘故所棄之卷有不及閱二三場者有不  
及閱經義者有并不及閱書義者所棄如此則其所取  
可知也吾又以為當寬其較閱之期使得研覈再四以  
定其去取至於士子平日所習之書若經若史一以頒  
諸學宮者課之而盡焚其私刻使耳目不淆此數者行  
則天下之實學可以漸而復矣

科舉論中

驅天下之士而出于實學則制科之弊可革雖然所謂實學者亦止於言詞之間而已矣吾他日之所取而用者非即用其言詞也夫宋世偉人如富弼而猶以科舉文字為難如司馬光而猶不長于四六近世如陳真晟胡居仁之流則又不屑為科舉之文矣使吾無以收之則天下篤實之士皆格于科舉而不進而吾之法又敝將救其敝非嚴薦舉之法重歲貢之科不可夫薦舉近

固行之矣然而未覩其效者是不得其方也漢世之舉  
賢良方正也天子臨軒親策至於再至于三其所言上  
自君身中至貴戚大臣下及宦豎皆直言極論無所忌  
諱不稱者罪坐舉主有保任之罰夫人情畏罰則不敢  
妄舉而知上之重已也則不憚于直言故兩漢得才為  
多然猶曰此往事也我明高皇帝行薦辟法親自較閱  
不稱職者輒坐舉主往往至于謫戍故當時文武忠孝  
之士布滿在位內自卿宰外至藩臬皆是也今則不然

名為保舉不復嚴重其事士之被薦詣闕下者吏部試以策論而已天下不知其所謂策論者何等也故其願仕者得一官以去而其不願仕者亦不至彼豈真不願仕哉知薦舉之重不及科舉故爾而薦人者則仍取諸有聲場屋而不第與其平日所親幸之人薦墨未乾而責任已塞矣夫薦至而不知其稱否姑試之而姑爵之而薦人者又不尸其罰則又安能拒不肖之倖濫而致奇偉非常之人哉且不幾以漢世賢良方正之名而居

魏晉九品中正之實哉今如吾說不過兩言而已曰其求直言也必重其罰不稱也必嚴此所謂明薦舉之法者也按國初歲貢之科在薦辟之下科舉之上儒生之居學校者先德行而後文藝歲課月考其法甚嚴成材者循序而進之于國學與察舉之賢並擢為給事中叅政主事等官故南北之二雍與郡國之學校表裏稱盛今自歲貢之科輕而士之廩于學而歷年多者無賢不肖皆得貢既貢則使之為學官歷一二遷至縣令或郡

佐輒注下考罷去之故士之為歲貢者齒暮氣衰榮路有限其自待甚輕在學校則壞學校在州郡則壞州郡上之人知其如此復姑寬之曰是齷齪者為可矜憐而已夫舉朝廷之士民姑寄此齷齪可憐之人以塞其無聊豈理也哉竊以為學校所急在選學官學官得人則士子之賢不肖可辨而歲貢之舊可復然所謂學官者不復可求之于今日之貢舉也或取諸薦辟之中或擇諸甲科之內務求其德醇而文高者俾居其職以行先



之以學課之其廩於學者不可專取文詞苟孝友忠信發聞于鄉者學官言于督學覈實而廩之然後教以文學而擇其士之尤異者不待年而貢之闕下而天子即用薦辟之法親試之試可則不待選舉即為錄用其次則俟其材成循次貢之國學以待甄叙一如祖宗朝授官之法有文無行者勿貢誤貢有罰此所謂重歲貢之科者也薦舉之法明歲貢之科重則士之實勝者出此兩科文勝者出于科舉不出于此必出于彼矣

科舉論下

嗚呼人才之生于今其能自立也難矣上所以成之者未嘗有法而所以壞之者又不一端吾每見大比之歲禮臣申明學制非嚴限字數即禁用子書以為文體士習蓋在是矣而弊有積之甚久而其實不可以一日安者則概未之及然則人材何由而成耶蓋今有漢唐宋以來所無之弊而不幸有之者有數十年以來名為革弊而其弊彌甚者此皆積于學校而病于科舉吾故盡

言之今夫太學者天子所以教化天下之始而禮義之  
宗也虞周宏遠吾不暇論論後世之尤敝者桓帝以鴻  
都學生入太學士類恥之夫鴻都者天子之私學其人  
本以經術相招後為尺牘及王書鳥篆其在今日則亦  
材藝過人之士也太學之士以其微蔑小道為天子私  
人則恥之矣宋世立三舍之法朱子呂東萊皆非之夫  
三舍之法考較藝文參以行實而降升其間其在今日  
則亦獎誘人才之方也先儒以其試之以浮靡之文誘

之以利祿之途則非之矣然則太學之重可知也太學  
之人才宜有以長養成就之可知也非國子及四方之  
成材者不宜入太學可知也今自援納例行百餘年來  
遂為功令士以廩增附之額分其入粟之等差而其餘  
則學校之廢棄者入焉純絀之不學者入焉商賈之多  
金者入焉此何為乎入粟之後挂名其間有終身未嘗  
跼胄監之席者問其人則國子生也此何為乎然而士  
之貢于學舉于鄉者猶施施然與之並列則使東漢之

士復興南宋之儒可作吾不知其歎息又當何如也此  
吾所謂唐宋以來所無之弊而不幸有之者也古者較  
士有中年比年之法蓋掌教之官視有司不同呂氏謂  
周禮六官惟學校之官不在官聯官屬其意所當深思  
者是也今者師儒之說既為具文而督學使者之官其  
體尊嚴與生徒相去遼絕其所掌有歲試有科試其稽  
考行義也不過俯聽于學官而其殿最文義也雖試有  
前後而一人之目無大相遠今使督學官于三年之中

科歲各一試士方試歸席未及煖而繼試者又至矣是  
一歲之中嘗得一再試也然科試則郡縣之官必先去  
取之而後進于督學是受試無已時也以不甚相異之  
殿最與不甚稽考之行義而受試無已時乃欲望其敬  
業樂羣知類通達則亦難矣此吾所謂數十年來名為  
革弊而其弊彌甚者也吾以為援納之例必當禁絕而  
一以勲戚命官子弟及士之貢于學舉于鄉者實之妙  
簡儒臣以為祭酒司業其立教則當以胡瑗之教湖學

及朱子分年立課之法為準督學則簡其考較即以科  
試為歲試合格者使之試于鄉否則黜之而不必又為  
歲試使士子得休其力以從事于學此二說行然後薦  
舉歲貢之法可漸施也抑吾又得一說焉可暫罷而徐  
議之者騎射是也夫射者學宮之古法我明高皇帝嘗  
用之以試士矣然前此不習既久一旦舉而責之綴文  
之士則不便者十九夫將復古制固不論其便否也然  
吾以為可暫罷者以其本之未立則不可齊其末也或

曰考較之簡其法則誠善矣今天下兵寇交訌泥沙用財取之援例入貲足以贍軍且騎射所以習兵也在平世猶不可廢况多難乎曰子以東晉之南渡為盛于今乎東晉猶能立太學徵生徒而謂今世不能者謬也謂藉此以資財用者無術也且學校興人材盛則其所得有過于騎射者矣今雖不罷騎射騎射其有益乎

科舉論後語

余既作科舉論向難余者又曰天之生斯人也



如置器然苟生金玉必不置之于泥塗苟生賢才必不使之阨窮于牖下也科名特寄徑耳子何患焉曰金玉之生于山川也制之而後生焉范之而後成焉不遇良工則没于丹矸朽石之下而已矣子何從知之由今之道而不變吾慮人材之日没也難者又曰今朝廷之所求者奇士耳非中人也經義能困中人豈能困奇士乎曰南宮三歲一試士士之釋褐者必三百人不

知此三百人者皆奇士乎抑中人襍出其間乎  
如中人襍出其間則其敗天下士多矣所學非  
所用所用非所學也又曰賢良方正之科固將  
器人于文辭之外也信如子說不過嚴責保任  
而已而取士之法終不能有異于漢世之對策  
是以行求之而以言取之也曰豈獨漢世哉數  
奏以言雖堯舜不外是也今天子赫然震動引  
見闕廷而親策之假以言色通以問難則人之

賢不肖出矣夫人才之赴人主如百鳥之追鶩  
驚也又曰學校之官吾何以識其賢而用之乎  
曰如東漢之先試博士可也如虞集所云令長  
各自禮聘亦可也其任必久其擢必優所以廣  
教化隆儒術也又曰凡學之掌教者三人焉試  
且聘之則不勝其優矣曰固也吾以為三人者  
可省其二也無已則虛其二焉以待教諭之擇  
賢者而聘之亦我國初之制也又曰胄監入貲

不自今日始也羅圭峰玘嘗以貲入矣已而為  
文人為名臣近則學校之有文者入焉何必禁  
也曰玘不足法也為人貲濫觴者未必非玘罪  
也我國家近有璫禍獻調頌功者多出太學諸  
生何無一人如范滂陳東者乎史推東漢之亂  
而不亡歸功于太學數君子靖康建炎之間三  
學生義聲震天下彼皆養士之效也今則非止  
失養而已其溷淆而挫辱之抑亦甚矣有文之

士人焉者倦于場屋厭于考較不得已而入焉  
也非宜人也又曰子之論則美矣然子之論騎  
射也猶謂待學校興乃可徐議今一旦欲于二  
三場責經史時務之實學于薦舉責賢良方正  
之全材于太學鄉學責有道之師儒率教之生  
徒不已亟乎吾將以子之矛入子之盾也曰宋  
臣葉適有言今宜暫息天下之多言進舉無親  
策制舉無記誦無論著稍稍忘其故步一旦天

子自舉之三代之英才未可驟得亦不至如近  
世之冗長無取也我明高皇帝已行科舉法仍  
傳至十餘年其時人材益出今能遠採兼適之  
言上師我高皇帝通變宜民之意何為不成何  
求不得余之前論特平平者爾雖然使以余之  
論告當路則駭笑而目以為狂者不知凡幾矣  
時勢之變日新月異而天下大事獨曰守常痛  
乎成俗之難回也

范增論

蘇氏論范增以其勸羽殺沛公為人臣之分而義帝之立增為謀主羽殺卿子冠軍為弑義帝之漸弑義帝為疑增之本故增之去當于羽殺卿子冠軍之時予獨疑蘇氏之期增太重而未核其實也增智謀之士耳非能以仁義事君者也其勸項氏立楚後非為懷王也為項氏耳天下並起而亡秦秦有可亡之實而我無可亡秦之名故不得不有所挾以令天下增之說項梁立懷王

猶張耳陳餘說陳勝立六國後也使勝遂行耳餘之計則耳餘將事勝乎將事六國乎夫人必有相許之素也而後可責其相急之誠增之于懷王非若張良之于韓五世相之而日夜求為之報秦者也彼其視喑鳴叱咤之夫以為可定大事而杖策從之其視懷王直竒貨焉爾羽之謀已集而事已濟則又贅旒焉爾彼豈與懷王同禍福者哉使其心果在懷王必不勸羽殺沛公矣何則沛公與宋義皆懷王所遣也沛公先入關則其功不



帝伯倍高于義義且以懷王之故不可殺況沛公乎羽  
即忌而殺之增宜奮起而爭之今羽且不忍于公而增  
惓惓欲甘心焉是先有無君之心而後動于惡也其尚  
得為有懷王矣乎夫羽之不殺沛公投鼠忌器也其卒  
弑義帝蓋增有以啟之也羽以陳平間行故疑增稍奪  
之權方圍滎陽時尚以增言急攻漢則前乎此者其不  
聽增計亦鮮矣獨殺沛公之計未行耳置沛公于漢中  
史固以為增計也使漫不見省則增之發憤而去不待

攻滎陽之日也吾又烏知弒義帝之謀非增畫之而羽聽之乎則謂弒義帝爲疑增之本殆亦遠于情矣至殺卿子冠軍增又本不宜去夫卿子冠軍之先鬪秦趙也其名曰乘敵乘敵之師深溝高壘勿戰使人入敵境絕其餉道然後彼坐困而我可得志漢之於楚是也李左車以此說武安君不用而敗周亞夫用之于梁楚七國而勝蓋其要在於絕敵餉道而不在于不戰明矣今章邯甬道之粟義未嘗出偏師綴之士卒凍饑軍無見糧

是自敝爾殺一自敝之將拔數百萬人命於虎口是羽有微罪於懷王有大功於諸侯也若之何以此時去哉羽之言曰王坐不安席掃境而屬將軍今不恤士卒而徇其私非社稷之臣此雖假竊之詞然亦何遽爲弑義帝之兆哉弑義帝之兆蓋始於怨義帝之欲如約王沛公于關中此則增有罪焉而不可以此專責羽也夫增之宜去亦多矣坑秦降卒二十萬人也屠咸陽也殺子嬰也王三秦降將也分封不均也數者無一不足以

失天下而增不去吾故曰增非能以仁義事君者蘇氏  
期增太過而未核其實也

衛青論上

淮南王安將反獨憚大將軍青與汲黯而蔑視丞相弘  
以下大將軍凡七出擊匈奴斬捕首虜五萬餘級一與  
單于戰收河南地遂置朔方郡其將兵多至五萬騎少  
或三萬騎未嘗折北而李廣嘗以偏師出塞多不過萬  
騎少或四千騎往輒無功間爲敵所生得其才器不及

青達甚然司馬遷爲兩人立傳譽廣不啻口出而於大將軍青但記其斬首獲生之數至於壁壘行陣料敵出奇之法闕如也心竊怪之及觀蘇建責大將軍選擇賢士之言及大將軍謝以奉法遵職不敢招士乃釋然曰遷所以不取大將軍之故在此矣蓋自戰國四豪以及漢初張耳陳餘之徒好爲卑躬厚禮籠取天下之豪傑流風餘韻浸淫成俗魏其武安以此構大獄掇奇禍而卒莫之懲如鄭當時見客無貴賤皆執賓主之禮張湯

造請不避寒暑韓安國推舉壺遂臧固之屬爲士論所  
慕至天子亦以是稱爲國器由三子者推之則西京士  
大夫二百年之好尚略可見矣彼李將軍死日天下知  
與不知皆爲盡哀以其結客多而延譽廣也大將軍奮  
自奴隸托身椒房一日赫然威震四裔其意以爲非避  
勢遠嫌謝絕賓客不能固結人主之心而免於禍患司  
馬遷窺見其旨則曰是謹身媚上之人而已矣曷足道  
哉於是并其戰陣方略俱抑沒之而獨咨嗟嘆息於李

廣然即其實而論之則廣雖有奇氣不過翹關曲踴之材而青能將數十萬衆而不亂則其爲大將之材終不可得而掩也昔者淮陰侯謂高帝曰陛下不過能將十萬爾朱榮謂兄子兆曰爾不過將三千多則亂矣蓋用兵猶角力然有百鈞之力有數十鈞之力有不能勝匹雛之力夫將軍青百鈞之力也李廣父子數十鈞之力也李蔡公孫敖不能勝匹雛之力也數十鈞之力過於能勝匹雛者而亦終不可以舉百鈞今乃曰彼有他長

遂并譽其力以爲出於舉百鈞者之上可乎故夫李廣  
無功誠不可謂之數奇而大將軍之戰法不傳是亦有  
遺憾爾

衛青論下

嗚呼若衛青者可謂有大將之才矣而吾獨惜其不知  
大將之道何謂大將之道荀卿有言曰可殺而不可使  
處不完可殺而不可使擊不勝可殺而不可使欺百姓  
此所謂大將之道也秦將白起不過一鷙忍之士耳非



其有仁義節制爲之根本也然而秦王使起攻邯鄲起  
眞見邯鄲之不可復攻也則爲之堅卧不起至於干犯  
嚴主之怒身首分離而終已不悔此無他不勝不完不  
可以冒而行之也今以武帝用兵言之今年出塞擊匈  
奴明年匈奴亦入塞寇鈔不可謂之完沙漠之地如石  
田之不可耕雖驅畜產百萬而還於胡漢之大勢不能  
增損毫末也不可謂之勝虛內事外使海內蕭然繁費  
天子卒爲之縱告緡置平準不可謂之不欺百姓此三

者皆冒而行之而青以肺腑在行間鳴劔擐甲唯所發縱不聞進一規獻一策以回天子窮兵黷武之心此可謂之知大將之道者乎今夫陷陣尅敵偏將事也長算遠略大將事也青以大將行偏將之事雖材武優于李廣十倍而其猥陋無術學不知軍國大計較之李蔡公孫敖亦無異矣吾因有感于王忠嗣哥舒翰之事焉唐玄宗欲攻吐蕃石堡城忠嗣謂非殺十萬人不可不如休兵秣馬觀釁而動玄宗不悅李林甫因媒孽其短忠

嗣知之而確守前說雖奉詔以數萬人給董延光而不  
給軍賞陰奪其謀其謂李光弼曰忠嗣豈以數萬人之  
命易一官哉未幾爲延光所奏幾陷極刑既而哥舒翰  
大舉兵伐之死者大半竟如忠嗣之言嗚呼賢哉忠嗣  
殆矣哉哥舒翰之爲將也其後安祿山反翰守潼關是  
時賊利速戰官兵利堅守翰實知之而爲中使所督責  
不得已引兵出關遂有靈寶之敗身爲俘虜唐室幾亡  
由其中有所見而不能死守以輕陷于不勝不完之地

也然則爲大將而不知道阿徇人主之意而以兵事倖倖者幸則爲衛青不幸則爲哥舒翰矣悲夫

諸葛亮論上

先主將東征孫權以復荊州之恥羣臣多諫一不從章武二年大軍敗績還住白帝亮嘆曰法孝直若在則能制主上令不東行就令東行必不傾危矣或曰甚矣武侯之處此爲可議也法正之見信于先主孰若武侯運籌帷幄之中決勝千里之外孰若武侯今伐吳之失計

羣臣皆能知之武侯既不力諫於前傾危已及而始追思法正何哉黃子曰此以形跡論人而未嘗設身處武侯之地者也古者小臣之諫其君也爭之以是非而不得則爭之以去就爭之以去就而不得則爭之以生死大臣則不然彼其君臣相與之際義已深矣情已戚矣勢不能以一言之不合奉身而去則度其君之不我從也而其言不可以徒發必將權一敢言之人以去就生死爭之於前而吾因而導之則吾之言行而無變色易

容之患昔者高帝入秦宮見其宮室狗馬重寶婦女之美意欲留居之樊噲諫帝出舍帝不聽張良曰夫秦爲無道故沛公得至此爲天下除殘賊宜綰素爲資今始入秦即安其樂此所謂助桀爲虐也且忠言逆耳利于行毒藥苦口利於病願沛公聽樊噲言帝乃還軍霸上人知帝之從良而不知樊噲之言有以爲之先也及即位數欲易太子周昌諫曰臣口不能言然臣期期知其不可陛下雖欲易太子臣期期不奉詔帝欣然而笑叔

孫通繼昌而諫至欲以頸血汚地帝曰公罷矣吾直戲耳及張良招四皓從太子入見上乃遂無易太子志人知帝之陰從乎良而不知周昌叔孫通之言有以爲之先也先主孔明相與之際有過乎高帝留侯而先主股肱虧喪義在復仇則其理之是非不至如留秦宮中與欲易太子之斷然其不可也度孔明必嘗進諫諫而不聽固無面折廷諍之理而時又無法孝直佐之者故先主遂行耳且正之爲人權譎多智與孔明好尚不同而

以公義相取蓋先主之有孫夫人固肘腋之患也而正  
爲之輔翼遂使先主翻然翱翔無內顧憂則其爲人可  
知矣孔明以正法正以奇奇非大臣之所以施於其君  
而或可以輔大臣之所不及此孔明之所以反覆嘆息  
於其人也而豈可執此以議孔明爲不諫哉嗚呼古大  
臣之所以匡君謀國者多存於不可見之間其言與事  
之載諸史冊者什二三而已而世之儒者乃欲執是以  
議其短長亦多見其不知量也夫



諸葛論下

諸葛亮伐魏與羣下計議魏延欲請兵萬人與亮異道會于潼關如韓信故事亮制而不許延嘗謂亮爲怯嘆恨已才用之不盡黃子曰蜀吳魏血食五六十年先主備大帝權武帝操及漢丞相亮皆命世之傑也三國者皆有事于戰而其意不同魏嘗以戰爲取吳蜀嘗以戰爲守何以明之先主與操頗頗起兵而操得勝勢獨先先主領徐州時操已破南單于降黃巾三十萬屢破陶

謙挾天子令諸侯矣先主爲呂布所襲狼狽奔操則固游操彀中者耳及先主得出而操已破呂布袁紹大勢成矣計操之所憚者獨先主而天若抗先主以待操之成及孫劉并力僅足支操故操之戰嘗主于取也孫氏先蜀立國乘間抵巇可以難操而伯符降年速隕襲許之計不成則過此無取操之時矣赤壁雖敗操之根本尚完先主問關入蜀復挫于吳雖有武侯爲之相而宿將謀臣後先凋盡蜀民輕脆兵力單少則其不能難魏

明矣故吳蜀之戰嘗主於守也武侯之屢出祁山所以  
守蜀也而魏延之計乃欲懸軍深入是所以取魏也夫  
使魏而可取也武侯豈不欲取之哉昔者曹操欺劉表  
之不能襲許也冒兵家之忌以攻袁紹而倖勝于官渡  
欺周瑜之非我敵也冒兵家之忌以攻孫權而卒敗於  
赤壁故夫行師而不出於什全者非大勝則大敗之道  
也操敗不可以遽亡蜀敗不可以復存曾是孔明而出  
於不可復存之地以倖其一勝乎吾觀孔明之告後主

曰今不伐賊王業亦亡惟坐待亡孰若伐之又曰今民窮兵疲而事不可息事不可息則住與行勞費正等吾是以知孔明之意常在于守也人之守蜀在劍閣孔明之守蜀在祁山人之守吳在長江孫權之守吳在合肥其意一也吳之諸葛恪破魏於東興遂欲違衆大舉幸而身死吳得以延數年之命蜀之姜維破魏於狄道而仍歲出師不幸而身不死蜀遂爲墟矣恪與維皆不知大帝武侯之深意而從乎魏延之策者也吾嘗爲之說

曰今有禦盜者於此盜至其門而禦之則無及也持兵出門若將捕之而盜自不至此諸葛武侯之謂也一夫奮挺而追盜此盜卻于前而彼盜入其室執其主以出此姜維之謂也嗚呼後世之守危國者其必以孔明爲法與

馬謖論

天下有可用之才有無所不能之才無所不能之才甚少而可用之才甚多因其爲可用之才也不顧其才之

所長而泛用之則才窮于所短而反見爲無才昔者帝  
舜之廷禹棄契皋陶垂益夷夔之屬各擇其所長而命  
之垂以工讓爰旵伯與則爰旵伯與亦必能爲工益以  
虞讓朱虎熊羆則朱虎熊羆亦必能爲虞夷以禮讓夔  
龍則夔龍亦必能爲禮而帝皆曰俞往哉汝諧是必垂  
益伯夷較之所讓三人有專長者焉吾就其專長者而  
命之則雖與之並長而不差及焉者舉可以不用且雖  
若不用而其人又自有專長者焉則吾又就其專長者

而用之已矣故曰及其使人也器之吾觀後世之謀國  
者用人各當其才則興用人不當其才則亡或當焉或  
不當焉或萬當而一不當焉則其害皆立發于所不當  
之處此必然之數也昔諸葛亮以馬謖才器過人好論  
軍計每引見談論自晝達夜先主嘗戒亮以謖不可大  
用亮謂不然當亮討雍閬時謖進規曰夫用兵之道攻  
心爲上攻城爲下心戰爲上兵戰爲下願公服其心而  
已亮用其言七縱七禽以平孟獲終亮之世夷不復反

此謾好論軍計之效也及亮出軍祁山不用舊將魏延  
吳懿等爲先鋒而以謾督諸軍在前與張郃戰于街亭  
謾兵大敗亮乃收謾下獄殺之後世咸以謾不可用而  
亮知人之明不如先帝以余觀之謾可用之才也亮特  
用之不得其當耳夫蜀之有南夷猶吳之有山越其性  
不馴易叛難服以孫權之雄才而山越不賓至爲之屈  
膝稱臣於魏然則南夷不服亮其敢北伐哉使亮強以  
兵威臨之不服其心而惟絀其力既乃兵挂于祁山之



野而不得解夷叛其內魏攻其外蜀之爲蜀未可知也  
自謾以心戰爲言亮始執其機而御之雍容翱翔如童  
牛之加牯于其首而不得肆於是釋然北向無復腹心  
之憂謾之運籌帷幄可謂精矣使謾但爲謀議之佐豈  
非龐士元法孝直之流亞哉亮乃絀魏延吳懿不用以  
謾爲前鋒則是以特將之任予謾也夫將才不可以參  
謀議謀議之才亦不可以爲將易之則將才失其勇謀  
議之臣失其謀譬之牛可服也馬可乘也服馬而乘牛

則牛馬兩失其用乃曰彼牛馬者皆棄物豈理也哉謬  
敗之後衆皆星散惟裨將軍王平所領千人鳴鼓自守  
張郃疑有伏兵不往逼也于是平徐徐收拾遺迸率將  
士而還當是之時平能敗而不亂賢于謬多矣然當亮  
南伐雍閬之時猝然問計于平吾知平之謀議必不能  
如謬之切中機要也嗚呼人各有能有不能以張子房  
之智略而但爲高帝畫策臣未嘗特將謝晦嘗從劉裕  
征討指麾處分曲盡其宜及宋文帝將討晦檀道濟曰

臣昔與晦同從北征入關十策晦有其九才略明練殆  
爲少敵然未嘗孤軍決戰戎事恐非其所長未幾道濟  
遂禽晦向使子房特將豈必能成淮陰之功而謝晦但  
爲謀臣豈反出道濟之下哉吾故曰謬可用之才也特  
亮用之不得其當耳

夏侯玄論

夏侯玄求交于傅嘏嘏不納謂荀粲曰泰初志大其量  
能合虛聲而無實才遠之猶恐禍及况昵之乎世以嘏

爲知人以余論之嘏之策玄誠似矣而所以拒玄之故則非其無實才也是時曹氏擁虛器于上國政兵謀皆自司馬氏出士大夫策名其間者爲曹氏難爲司馬氏易玄蓋爲曹氏者也嘏則爲司馬氏者也夏侯曹氏世爲婚姻玄以貴戚之臣名冠四海賣國與人全軀保妻子此非玄之所肯爲也而爲玄黨者何晏鄧颺李豐張緝之徒皆纖利小材非有沉謀遠識足以集事且兵柄又不在其手然則玄之危無智愚皆知之矣方司馬懿

死許允謂玄曰無復憂矣玄嘆曰士宗卿何不見事乎  
此人猶能以通家年少遇我子元子上不吾容也夫玄  
且自知其不免而况嘏乎玄欲交嘏蓋以嘏才名素著  
欲與同獎公室而嘏方傾心司馬氏則玄之來交所謂  
載禍相餉者也故懼而辭之以見詰于荀粲故又飾爲  
近似之言以匿其情實耳且鍾會奸人之雄以玄視之  
猶奴隸也嘏以明智交會其所著論會又從而集論之  
嘏不禁也是豈峻于玄而通于會哉以會與已皆司馬

氏私人不復能異同也玄死之後毋丘儉文欽知司馬氏將篡舉兵於外嘏力勸司馬師將兵自行而身與俱東儉欽破敗嘏有謀焉此嘏黨于司馬翦伐曹氏之驗也嗚呼自古側身危亂之間力不足而忠有餘者吾讀史得三人焉孔融袁粲及玄是也融殺于曹粲殺于道成舉世皆知其忠也而玄以嘏言故僅見其空虛無實悲夫

祖述論

祖逖牙門童建害新蔡內史周密遣使降于石勒勒斬之送首于逖曰天下之惡一也叛臣逃吏吾之深讐將軍之惡猶吾惡也逖遣使報謝自是兗豫間壁壘叛者皆不納君子曰逖於是乎失策矣晉世之所以得其民者非有如周漢之隆而所以失其民者亦非有如秦項之虐石勒以無賴嘯聚其間不過乘司馬氏骨肉相殘之隙煽惑逋逃迫而用之耳羣者逖進說元帝以爲遺黎既被殘酷人有奮擊之志大王誠能發威命將使若

逖等爲之統主則郡國豪傑必當因風向赴此數言者可謂得其要領矣故其濟江之日所將不過二千餘人未幾而黃河以南盡爲晉土此雖逖之善于撫御然亦人心未忍忘晉之驗也石勒狡黠多智禽苟晞誘王浚推劉琨算無遺策而獨差憚于逖者以逖爲人望中州豪傑多歸之顧已以反爲名能合其衆而不能固勢將盡驅而歸逖也故爲逖修墳墓置守冢冀以感逖而又因其叛臣之來斬而送之陽以禮交而陰以愚之逖乃



不悟墮其術中以至充豫間壁壘叛者皆不納於是乎  
自墮其黨而啟慕義之人以歸賊也豈不惜哉夫天下  
雄傑智計之士多出于虜掠之餘奔竄之中陳平歸漢  
而項籍亡許攸歸魏而袁紹破兩人之在當日則亦叛  
臣逃吏也設漢高魏武皆拒而不納則兩人者雖有深  
謀奇計何由而効于明主之前乎且夫慎固封守各保  
分界斯乃敵國相交之禮如羊祜陸抗之時可爾逃之  
視勒則賊也語曰名其爲賊敵乃可服背逃而往者逃

得目之爲叛臣逃吏棄勒而來者勒固不得而臣且吏之也爲逃計者斬勒使焚勒書正言以諭賊曰向爲石勒誣誤者皆吾赤子自今以後有斬勒首來歸者請於朝廷爵萬戶賜千金拔身歸命者聽如是則足以寒亂賊之膽鼓忠義之氣而亦示天下有能爲矣惜乎逃之慮不出此也

李密論

漢唐之得天下皆以先定關中漢高帝之在河南也王


離宿重兵於河北其勢可以躡漢兵之後而有項籍綴之故高帝得以入關唐高祖之在晉陽也王世充宿重兵於東都其勢可以躡唐兵之後而有李密綴之故高祖得以入關夫項籍李密豈知有漢唐者哉彼各爲其事而適以取天下之機予漢唐所謂真主之興必有爲之驅除難者此爾今夫李密之才雖不足以希太宗然在隋末羣雄之中固亦未有其比也顧其人智足以知天下之奇計而膽不能決爲人謀則長自爲謀則短始

楊玄感以密爲謀主密陳三策其上以煬帝在遼隔絕  
千里當長驅入薊扼其歸路其次以關中四塞天府之  
國勸玄感鼓行而西經城勿攻直取長安其下則謂襲  
取東都而以百日不克四方兵至爲憂玄感從其下計  
卒攻東都不克而敗此密之所扼腕而嘆也及其身自  
起兵之時煬帝在江都徐洪客勸密沿流東指執取獨  
夫此即密之上計也柴孝和說密留翟讓裴仁基等牽  
制東都自簡精銳西襲長安此即密之中計也從其上

計湯武之師也從其中計漢高之師也密兩皆不從而自用其下計卒兵敗洛水身死桃林是何爲玄感謀之上而自爲謀之拙也密之言曰我所將皆山東人見洛陽未下誰肯西入夫漢高亦嘗將山東人所收陳勝項梁散卒及奪剛武侯軍殆不滿萬而竟以入關當帝未入關時攻昌邑未拔則過高陽攻開封未拔則攻潁川汲汲然以批亢擣虛爲事而未嘗一頓兵于堅城之下譬如善奕者然得其大勢則雖有所捐以與人而吾固

已勝矣今密散洛倉之粟而不能收席士馬之銳而不能乘棄天下之上游而爭河洛四戰之地雖得東都唐固將折筮使之矣况必不得哉吾嘗謂李密之智高於英衛項籍之勇過於英彭此兩人者皆可以爲人用而不可以自用爲人用則將相之才自用則獨夫而已矣若夫唐之高祖則不然卑詞以謝密使之綴東都之兵而我得專意關中兩從裴寂世民之計分兵以攻屈突通於河南而自引軍西上此二事者雖謂之彷彿漢高

可也



欽定四庫全書

陶菴全集卷三



欽定四庫全書

集部

陶菴全集卷四

詳校官編修臣錢樾

總校官知縣臣楊懋珩

校對官中書臣黃冕

謄錄監生臣龍錫

欽定四庫全書

陶菴全集卷四

明 黃淳耀 撰

史記評論

五帝本紀

堯舜禹湯或以爲謚或以爲皆名或以堯舜禹爲名湯  
爲號余謂皆非也謚法起于周公以堯舜禹湯爲謚者  
固不足據而以有鰥在下曰虞舜及來禹等文證其爲

名則亦非也史傳多追稱之詞如左傳石碣稱陳桓公  
方有寵於王戰國策馮煖謂梁王曰齊放其大臣孟嘗  
君此類甚多二典亦當時史臣所記舜禹皆追稱耳以  
來禹爲君稱臣名則禹敷土爲臣書君名乎堯之祖稱  
藝祖文祖堯稱神宗豈得君臣皆名漫無所別乎孔子  
于老彭已不斥其名如堯舜禹果名豈得屢見于書乎  
按秦始皇制曰朕聞上古有號無謚中古有號死而以  
行爲謚則堯舜禹湯皆號也生爲號死爲謚

太史公五帝紀贊以百家言黃帝其文不雅馴又歷叙  
已所采于長老及春秋國語與他說之足以參古文者  
而成是篇則凡騎龍鑄鼎諸詭異事乃太史公所謂不  
雅馴棄如涕唾者也今人乃掇其棄餘而津津艷稱之  
何哉又太史公史贊皆有超識司馬貞妄譏之以爲不  
能備論遂別爲述贊櫟括通篇每人置評事雖不遺意  
見則猥陋矣

夏本紀

帝禹立而舉臯陶薦之且授政焉而臯陶卒封臯陶之  
後於英六或在許而後舉益任之先舉臯陶後舉益此  
他書所未及孟子謂禹臯陶見而知之此可證也太史  
公紀三代以前事多荒忽吾取二三策耳

殷本紀

微子去商殷紀及微子世家皆謂與太師少師謀太師  
名疵少師名彊見於周紀世以比干爲少師者誤也

秦本紀

子長爲本紀者三後世皆不與焉秦也始皇也項籍也以是繼五帝三王之後可乎曰不可不可則曷爲紀之曰此即正統之說也歐陽子有言居天下之正合天下於一斯正統矣堯舜夏商周秦漢唐是也蘇子有言孔子刪書而虞夏商周皆曰書湯武王伯禽秦穆公皆曰誓以爲正統之說其誰曰不可子長之本紀其即歐陽子蘇子之論所從出也夫子長豈不知秦項爲天下之公惡也哉以爲政固嘗繼周而有天下矣籍固嘗專天

下之約矣吾從其繼周而有天下與夫專天下之約者  
而爲之本紀非進秦項于三代也雖然秦自始皇以前  
固西戎附庸之國爾籍雖專天下之約未嘗一天下而  
稱帝也爲有天下之始皇立紀則可爲西戎附庸之國  
與未一天下之項籍立紀則不可故秦與始皇宜合而  
爲一籍宜降而爲傳

世以秦爲伯益之後以栢翳伯益爲一人蓋據秦本紀  
大費輔禹平水土佐舜調馴鳥獸鳥獸多馴服是爲栢

翳之語而以尚書孟子之文推之舜時自益外無平水土及調馴鳥獸者遂以爲即益也按杞東樓公世家云栢翳之後至周平王封爲秦項羽滅之垂益夔龍其後不知所封不見也是則益翳爲兩人而秦非伯益之後明矣世儒讀史沿誤此其一端

三族之罪始於秦文公而商鞅因之漢祖名爲除秦苛政然始定天下即族信越文帝甫除收孥相坐律令旋族新垣平是後武帝數興大獄而秦法遂終漢世不變



吾故謂漢非雜霸也雜秦耳嗚呼秦之遺孽毒甚矣哉  
秦自穆公三置晉君以後嘗與晉更相強弱至六卿內  
相攻晉始不能有加于秦然晉尚爲一也至智伯死分  
其國爲韓趙魏而晉析爲三矣夫以全晉之勢尚與秦  
更相強弱析而爲三則安望其能支秦哉吾故曰三晉  
爲諸侯秦取天下之大窾也

秦始皇本紀

左丞相去疾將軍馮劫與李斯同諫二世二世下去疾

斯劫史案責他罪去疾劫曰將相不辱自殺斯卒具五  
刑夫去疾劫能諫其君又能引分自裁亦賢者也惜其  
與李斯同事不能早決去就相攜閤朝駢首并命哀哉  
項羽本紀

楚之擊漢也非身在行間則不勝田榮反齊地則必自  
擊之彭越反梁地則又自擊之雖所向摧破而兵力疲  
矣故漢一舉而覆之垓下自古以弱敵彊者句踐樂毅  
漢高皆善用合從之法者也

拔興於楚而敗者項梁梁之才非勝廣武臣及也爲秦將而敗者章邯邯之才非司馬欣董翳及也爲項籍將而敗者龍且且之才非薛公曹咎及也梁驕章邯破之章邯驕楚楚破之龍且驕韓信信破之驕者敗之媒哉

義帝始能奪羽軍將之又能遣沛公入關而不遣羽故有英氣然非其材足以制羽也羽方起事挾帝爲奇貨以令天下事濟之後自當不免帝蓋遊其彀中而不知

也悲夫

楚漢之際六國蠭起自立惟田氏最與楚齟齬而陰德  
於漢甚大初田儋救魏爲章邯所殺儋從弟榮收兵走  
東阿邯追圍之項梁聞榮急乃引兵擊破章邯邯走而  
西是榮之復振皆項氏力也微梁榮且蟲出矣及梁既  
追章邯邯兵益盛梁使趣齊兵共擊章邯榮乃要楚趙  
殺田假一門三人楚趙義不忍殺則終不出兵夫假固  
齊王建弟也齊人以儋死故立之既已逐之矣又必欲

殺之又以楚之義不忍殺也覆用爲讎坐視項梁之敗  
不義甚矣項羽由此怨榮入關後分王田都田安榮距  
都殺安盡并三齊之地羽北伐而漢遂得劫五諸侯兵  
乘間東向矣雖榮之舉事非以爲漢而實陰爲漢用也  
吾故曰田氏最與楚齟齬而陰德漢甚大田橫死高帝  
爲之流涕帝固心德田氏也夫

鴻門之會項王項伯東向坐亞夫南向坐沛公北向坐  
張良西向侍按古人尚右故宗廟之制皆南向而廟主

則東向主賓之禮亦然儀禮鄉飲酒禮篇賓復位當西  
序東面是也韓信得廣武君東向坐西嚮對而師事之  
項羽得王陵母置軍中陵使至則東向坐陵母欲以招  
陵周勃不好文學每召諸生說事東向坐責之皆以東  
爲尊然則鴻門坐次首項王項伯次亞夫次沛公也

項王立六國後樹秦敵此入關以前事非入關以後事  
也項羽破秦爲西楚霸王矣復封諸侯王將相此正與  
酈生立六國後之策暗合後著用前著所以敗也景陵

鍾氏論羽如此愚謂不然羽率諸侯兵西入關不過以破章邯軍爲諸侯冠耳此時諸侯所推戴之懷王尚在楚先入關有功之沛公不可殺從入關之諸侯各有功不分王之將置何地乎盜亦有道羽既稱諸侯長能一切以無道行之乎羽失天下正坐背約宰割不平故田榮陳餘首發兵端而沛公乘之于外不可云失在分封也子房雖發八難前勸漢王捐關以東予信越等後又勸漢王益封信越使人自爲戰其所異於酈生者立六

國後則不復爲漢用立信越則漢將也

高帝本紀

劉辰翁曰自項梁以來攻定陶不下攻外黃未下而通行無忌殆欲汲汲赴要害擣虛邑耳此最兵家要妙令人不及掩耳得敵去爲幸何暇追襲此橫行之道也若每邑殫兵得寸失尺畏首畏尾聲實皆喪故高祖攻昌邑未拔過高陽攻開封未拔攻潁川蓋深喻此獨宛強大追敵近復過而西則前後相應非他邑比也故子房



憂之云云須溪此言可謂深得楚漢用兵之略矣李密與唐太宗並爭天下徐洪客獻書於密以爲大眾久聚師老厭戰難以立功當乘進取之機因士馬之銳沿流東指直向江都執取獨夫號令天下密壯其言而不用李淵欲引兵西趨長安猶豫未決世民曰兵貴神速吾席累勝之威撫歸附之衆鼓行而西長安之人望風震駭取之若振槁葉耳若淹留自斃於堅城之下坐糜歲月衆心離阻則大事去矣淵從之遂克長安此成敗之

機也然亦惟秦隋之弊故漢唐得行其乘間襲取之謀  
使國猶有人固危道也前高祖而入秦者周章至戲却  
矣章豈非推鋒直往者乎魏延以夏侯惇怯而無謀欲  
假精兵五千直從褒中出十日可到長安而令孔明從  
斜谷來與之會亮以爲危計不用當時夏侯惇雖怯而  
司馬懿在朝謀士如林非可以聲勢恐喝取也自子房  
不敢易宛而延欲以偃兵空虛之國視魏謬哉此兵法  
所貴於知己知彼也

馬疎班密向有定論然亦論其行文耳其叙事處互有疎密如高帝紀高祖爲亭長乃以竹皮爲冠令求盜之薛治時時冠之及貴常冠所謂劉氏冠也史記書此似漫然取致爾而班史于高帝八年中補出爵非公乘以上無得冠劉氏冠此班密于馬也項羽本紀丁壯苦軍旅老弱罷轉餉本以起下挑戰決雌雄毋徒苦民父子語遷于高帝紀中自削之固乃仍其削處而以羽語入列傳兩處皆少生色矣此班疎於馬也他可類推

呂公好相人見高祖狀貌重敬之引入坐上坐蕭何曰  
劉季固多大言少成事塵埃中識天子鄼侯且難之況  
他人乎高祖得天下後所封皆故人所愛所誅皆仇怨  
何不廣也夏羹之怨不忘其嫂亡賴之言必反其父孰  
謂乃公大度者石勒少時爲李陽所辱僭號後乃能優  
容之彼且如此而高帝不能惜哉

紀信不侯

辨一則  
見雜著

息者男女之總稱俗以女爲弱息蓋本史記呂公謂高

祖臣有息女願爲箕箒妾而誤以息爲女也息訓生戰國策左師公曰老臣賤息舒祺最少不肖祺左師子也

呂后本紀

呂氏死產祿欲爲亂其不敢即發者非獨憚絳侯朱虛也以灌嬰齊王連兵於外故也韋孝寬破尉遲迴於外而楊堅篡周魏元忠破徐敬業於外而武曌篡唐比事觀之嬰之功大矣

高帝憂趙王如意左遷周昌相之豈特以其貴彊故哉

昌曾力爭廢太子事爲呂后德庶幾呂后不復作惡也  
然後殘忍豈復顧念前事一木彊人適速之斃耳劉辰  
翁謂高帝托人必得如信布者乃可否則能調護兩宮  
間如滕公輩又否則能以言語微意感動如陸生余謂  
帝處此決無上策果托人如信布必挾趙王爲奇貨搖  
動天下矣滕公陸生輩居外廷非有如辟陽侯朝夕存  
側者且以留侯之智呂后使建成侯劫之何滕公陸生  
之能爲也無已其如齊悼惠王之尊魯元公主乎又無

已其如朱虛侯章之妻呂祿女乎

文帝本紀

余讀文帝紀即位將一年乃修代來功羣臣請立太子  
下詔欲擇諸侯王昆弟及賢有德義者羣臣固請始許  
之又立趙幽王太子遂王遂弟辟彊及齊悼惠王子朱  
虛侯章東牟侯興居然後立其三子爲王次第可觀以  
爲有王者舉動及讀齊王傳始誅諸呂時朱虛侯章功  
尤大大臣許盡以趙地王章盡以梁地王興居及文帝

立聞朱虛東牟之初欲立齊王故黜其功二年王諸子  
乃割齊二郡以王章興居始知帝所爲假仁者耳射鈞  
斬祛之恨霸者猶能忘之今乃小嫌黜人大功豈公義  
乎

田橫之海島尉佗之蠻夷皆足以爲中國患佗材非弱  
於橫者也高帝於橫則召之怵以不來則加誅至自殺  
而後已于佗則因而立之何也橫與帝俱嘗南面稱王  
故以臣之示武佗不起中國故以封之示恩召橫時初



定天下兵力尚完封佗時征荼征布征信征豨兵力殫矣帝之屈伸操縱如此

禮書

孝文帝好道家之學以爲繁禮飾貌無益於治躬化謂何耳故罷去之是謂有其內而無其外漢武招致儒學之士共定禮儀十餘年不就至太初之元改正朔易服色可謂銳意禮樂矣而神仙土木征伐之事日盛是謂有其外而無其內

律書

律書先謂律爲萬事根本而兵械尤所重以下竟言兵  
太史公曰一段又言文帝之能息兵突接書曰七止二  
十八舍則叙律之應歷以原律所自來而後始言律數  
末復歸之于神爲生數成聲之本其理微妙其文簡質  
變化定非褚先生所能辦也

封禪書

太史公作封禪書此後人所謂謗書者也起云自古帝

王曷嘗不封禪爲下文舜禹封禪張本繼云蓋有無其應而用事者矣未有睹符瑞而不臻乎泰山者也爲下文秦始皇封禪張本繼又云雖受命而功不至云爲下文漢高漢文不及封禪張本又云故其儀闕然湮滅其詳不可得而紀聞云便見封禪爲曠絕之事而非世主所當舉行者也尚書曰一段舜之封禪不過如此禹遵之亦無神仙可記至孔甲失德之君始聽於神而禋祥之說後世紛紛傳會如太戊高宗則不過修德勝災而

已至周世郊社之舉亦未始及于神仙此所以爲三代  
盛隆之際也周衰道廢而西時廊時始興於秦此武帝  
祠神君親祠竈之濫觴也管仲設辭以拒桓孔子存禘  
而不論自秦開禱祀之端始皇承之益以八神之說杳  
渺無稽而齊人奏五德之運燕人爲方仙道則謬悠之  
說流傳於此二方此武帝時海上燕齊迂怪之士之濫  
觴也三神山之說極幻而秦皇信之封禪之後十二歲  
秦亡甚矣封禪之無益後之人主知此亦可以悟矣於

是結之曰此豈所謂無其德而用事者耶以見漢武固無德而尋秦皇之覆轍者也以下叙秦時山川百神之祀以見其淫黷無稽而漢興高祖草創不及釐正漢文稍惑於新垣平之說俄厭怠而止孝景亦無所興以見文景之爲賢君也此下鄭重其辭以接之曰至今天子今天子初即位尤敬鬼神之祀以見古者之封禪不過以告成功而武帝之封禪乃在於求神仙也始于求神仙終則崇信李少君於是燕齊之士翕然來臻競述其

鬼談詭說以惑帝而帝終已不悟矣其紀文成五利公  
孫卿之言皆鄙倍幻誕中人以下皆不信而帝酷喜之  
弗見而以爲德星天旱而以爲乾封直書其事而已宛  
然一始皇矣文章之妙如此至其筆法往往見於單句  
隻字之間其屢用或曰字蓋字焉字若云字皆疑辭也  
茅順甫曰文幾三千言而前後血脉貫串如一句誠然  
哉

太史公封禪書之妙全在叙舜禹三代及秦始皇事爲

案而入武帝後隱然見帝之異於舜禹三代而同於始皇褚先生節之自尤敬鬼神之祀以下爲孝武本紀神氣索然矣所謂續鳧截鶴者

太史公八書中封禪河渠平準乃端爲譏武帝而作然河渠書當另看蓋塞宣房有憂民之心焉是其倦於神仙時也

平準書

余嘗謂漢之文景能富而不能教蓋每歲下復除蠲恤

之令此善政也幾於王矣然漢文從晁錯言輸粟拜爵  
至得爲大庶長大庶長之官食萬二千石矣乃亦以輸  
粟得之孝景又募民輸粟贖罪則不軌之民恃富而犯  
法者固不能無也是以漢武之初雖家給人足至於錢  
貫朽粟腐敗而兼并豪黨之徒武斷于鄉曲宗室有土  
公卿大夫以下爭於奢侈室廬輿服僭于上無限度此  
皆禮義鮮少之故也不待武帝靡耗中國而已知其不  
可久矣漢有最不可解者坐酎金失侯之法也夫通侯



之先固嘗竭智力與高帝定天下者也使之出金助祭  
猶曰包茅縮酒遺意存焉然亦異乎古矣乃至不如斤  
兩及金色惡輒以此削國所坐者微而闕剪功臣之後  
大無謂也豈漢世封爵太多食邑既廣縣官不能支而  
設法以削之耶當時坐此法者甚多武帝時至百餘人  
太史公見之平準書中則朝廷微意皦然矣

卜式者富人之學黃老者也弟壯出分獨取畜羊百餘  
田宅財物盡予弟式入山牧十餘年羊至千餘頭買田

宅而其弟盡破其業式輒復數分子此在陶白輩優爲之然有長者之意焉漢擊匈奴式上書願輸家之半縣官助邊自人情言之非欲官則言寃而式兩皆無之非果不欲官也彼操老氏欲取故與之術知時主所急在財而細其綸芳其餌投竿跪膝而以釣武帝也乃詘於公孫弘久不見報數歲乃罷人之處此亦可以倦而休矣式行之不厭明年又持錢二十萬予河南守以給徒民助貧人者籍天子乃以式終長者而三年中驟躡九

卿進官少府居奇貨者孰善於式哉且當式時告緡之事將起式逆知海內財匱天子眈眈富民不久家且破故不如先事輸財不惟免禍又以得官及式相齊而揚可告緡遍天下中家以上大抵皆遇告杜周治之獄少反者使式此舉稍遲必無幸矣未幾以言鹽鐵算船事致天子不悅稍誅其官又因天旱求雨進言曰縣官當食租稅而已今弘羊令吏坐市列肆販物求利烹弘羊天乃雨斯言也雖謂有大臣之風可也太史公平準書

以式語作結雖其意在於譏武帝而亦有取於式也夫  
吳太伯世家

傳曰父不受誅子復讐可也子胥之父奢以無罪見殺  
於平王其兄尚駢首并命爲子弟者有至痛焉員也倒  
行逆施以快其悁悁之忿君子固不深誅也若曰誅之  
則傷人子之心與之則悖君臣之義置而不道可也獨  
員之進專諸於公子光以成其弑僚之謀則吾不能無  
憾焉諸樊兄弟四人以其先王愛季子札欲立之讓不

肯立諸樊乃欲兄弟以次更立必致國於季札及餘昧  
卒欲授季札季札復讓逃去於是吳人立餘昧之子僚  
爲王夫光爲諸樊之子季札不立則光當立固也然僚  
業爲國人所援立而爲君矣札則逃之光則弑之而員  
也以急欲報吳之故進人於光側而速其弑焉是不亦  
傷君臣之義而大逆天道也哉語曰伐國不問仁人如  
子胥者難與並爲仁矣

齊世家中載管晏事吳世家中載子胥事越世家中載

范蠡事鄭世家中載子產事蓋皆掇其大者而管晏子  
胥另立傳范蠡又入貨殖傳子產又入循吏傳太史公  
之惓惓於五子至矣獨不爲季札地乎豈以其讓國大  
節已見吳世家中欲別立傳無可稱述乎愚謂管晏事  
功既詳見齊世家而本傳止摘其一二逸事如札讓國  
之外豈無可論者即觀樂事已足別立一傳矣札爲聖  
人所許乃不得與管晏比太史公於此恐失大書特書  
之義也蘇子由謂春秋諸侯國而不人者三楚始稱荆

僖元年稱楚人文九年書楚子自是遂與春秋齒而吳越終春秋不人蓋吳越雖戰勝攻取而無禮義以自將故吳亡而越亦微至於楚雖禮義不足道而亦無愧於齊晉故其後遂與戰國相終始由是觀之禮義豈誣也哉按三國皆僭稱王其爲蠻夷等也吳以強陵中國時越志在復讐皆非有仗義之舉獨莊王破陳爲縣從申叔時之諫而復之鄭伯肉袒即麾軍退舍宋華元以情告即罷兵解圍此三事者信乎其爲霸主也子由所謂

禮義當指此使當時能革僭號則桓文何足道哉

齊太公世家

太史公諸世家叙諸侯事而王室始亂伯主代興皆謹書之如厲王之奔宣王之立幽王之弑周東徙雒秦始列爲諸侯小白重耳宋襄楚莊之立卒與申生之殺及敵國相滅各國臣子之弑其君皆三致意焉而於孔子之生卒及相魯尤詳至書魯隱公初立者以爲作春秋地也此等義例皆不媿良史



管子天下才也其始委質子糾而事之襄公既弑則惟恐子糾之不得立也而其爲子糾謀則亦有未善焉春秋時列國亡公子之在外而終得反國自立者外必有強國主之內必有強臣應之然後可以得志管子一出即奉子糾奔魯夫魯相忍之國也豈可恃哉彼莒衛爲小白外主高國爲小白內主莒衛合則足以敵魯而管子在外固不能敵高國也管子盍求大國如秦晉者而請命焉而陰結其大夫之足以制高國者以爲腹心然

後求人如不得人亟爲逃死之計可也乃竟貿貿然出  
于于然人傲倖於射鈎之一中而懈不復備遂使子糾  
生實之殺如屠豕然豈不惜哉夫晉文當奚齊卓子既  
弑之後晉人來迎可以入矣其不入者畏內變也及間  
關十九年輔之以秦繆之威而後敢入呂省卻芮復懷  
反側微勃鞞之告則文公幾於不免甚矣亡公子自立  
之難也嚮使子糾幸而先入高國謀之於內小白攻之  
於外事猶未可知也況不得入乎有如秦晉主子糾於

外則彼小白初立又安敢以不義脅鄰國使殺其兄弟而束縛其臣以歸於已乎吾故曰管仲天下才也而其爲子糾謀則未善也意者子糾非伯才天固將開小白而使之主盟中國歟

甚哉卻克之忿戾也使於齊齊君使夫人帷中而觀之夫人笑之笑者固無道矣克連兵東伐至欲得齊君之母以爲快不已甚乎且齊使至晉卻克嘗執四人殺之於河內矣笑人之使而欲執其國母刑人之使者當何

如乎宜其無後於晉也

齊襄公咎主屨者弗及管至父殺襄弗以身死之齊莊公咎宦者賈舉及崔杼弑莊舉以身助之咎弗者襄公以見公子彭生而失屨弗無罪也咎舉者不知何事咎之當不當未可知也而二人之報其君逆順不同如此人之善惡固天性哉

田闕相爭子我殺於成子而齊亡曹馬相軋曹奭殺於仲達而魏亡

魯周公世家

魯公伯禽之初受封之魯三年而後報政周公周公曰何遲也伯禽曰變其俗革其禮喪三年然後除之故遲太公亦封於齊五月而報政周公公曰何疾也曰吾簡其君臣禮從其俗爲也及後聞伯禽報政遲乃嘆曰嗚呼後世其北面事齊矣夫政不簡不易民不有近平易近民民必歸之黃子曰此非周公之言今按此說斷乎其爲謬也夫分茅胙土南面而君一國以長子孫以成

教化在周公固當爲百世計其於伯禽必非率爾遣之而已也計魯國之人民風俗與伯禽立政之繁簡報政之遲速皆必有面命而手畫之者伯禽特奉行其意耳豈待報政之後始訝其遲而乃徐問其所以立國之故歟又豈待太公報政之速始服其簡而嘆其子之智不出此歟且國無成俗顧轉移何如耳以朝歌之汚染聖人猶能變之今治魯不至若朝歌之難也何三年之內立法一定遂坐視其後世之北面於齊而莫之能改歟

考魯公之國在成王踐阼之初周公攝政方始也審以太公之法爲善則失之於魯猶可移之于周今乃三年而定東土七年而還政然後營洛邑居九鼎先是官政尚未次序至是乃作周官官別其宜乃作立政以便百姓則其涵濡漸漬更有甚焉而洛誥無逸等篇訓辭諄復卒亦不聞有所謂簡易之說何歟夫三年者報政之常期虞廷三載考績孔子爲政亦曰三年有成伯禽之報政即孔子之成也此而尚以爲遲則必出於一切苟且

之法然後可吾不知其何以爲周公與不但此也太公  
聖人之亞治國必當有法豈有五月報政之理與爲此  
說者戰國諺悠之談而太史公采之淮南子采之韓詩  
外傳采之則皆義理不精好奇輕信之故也

衛康叔世家

衛伋壽晉申生事極相類伋壽至性既類申生而晉獻  
以烝齊姜生申生衛宣以攘伋婦齊女生壽亦相類齊  
女讒伋驪姬讒申生亦相類申生死無後伋壽死亦無



後亦相類獨壽爲齊女所出其母讒及而壽死之此尤人情所難甚乎哉孝子之不得於頑嚚也

宋微子世家

作微子世家言而箕子比干附見焉不幾重微子而輕箕子比干乎箕子國於朝鮮比干絕無後故二子皆不得別立世家使爲箕比立傳則與微子不類設以箕比之故降微子而同傳則微子爲宋祖又無可降之理故牽連書之而贊復以孔子之言終之此太史公筆法所

在

蘇子由曰聖人雖與人同處而其中浩然與天地同量  
彼其食粟衣帛蓋有不得已耳而況與人爭利哉此爲  
周公而發余最愛此論以爲非坡公所及蓋封武庚於  
殷封微子於宋舉蔡叔之子胡爲卿士周公之心與堯  
舜一也坡公非武論直是敢於背誕

路史云以微子之賢吾君之子而商人父師之顧乃使  
之代商後而邦之宋宋爲故亳商之舊都民之被商之

澤者固未忘也使微子少異其志則全商之地亦非周  
矣成王周公方且晏然命之不少爲疑卒以安堵非聖  
人之盛德能如是乎此論可與子由相發

晉世家

晉世家叙文公入立呂省卻芮作亂事繼以文公修政  
施惠百姓賞從亡者及功臣大者封邑小者尊爵未盡  
行賞因襄王以弟帶難出居鄭地來告急於晉晉初定  
欲發兵恐他亂起是以賞從亡未至隱者介子推推亦

不言祿祿亦不及此一段實補左氏所未及子推從亡在狐趙之列不應文公忘之文公方有事圖伯亦不宜忘其功臣使來者聞而解體也賞未及推者不獨內外倥傯亦以推功大宜受封邑未及區處耳如左氏所載則文公憤憤甚矣安能圖伯

晉勝楚於城濮歸而行賞狐偃爲首或曰城濮之事先軫之謀文公曰城濮之事狐偃說我母失信先軫曰軍士勝爲右吾用之以勝然此一時之說偃言萬世之功

奈何以一時之利而加萬世功乎賞則先萬世之利戰則倣一時之功此文公之所以止於伯歟不然雖爲西伯可也戰則倣一時之功賞則先萬世之利此文公之所以終能伯歟不然雖爲宋襄可也

晉悼公問治國於師曠師曠曰惟仁義爲本仁義二字自孔孟而外無人能道而曠以一瞽矇發之大哉言乎太史公書之亦是特筆

楚世家

莊王即位三年不出號令日夜爲樂令國中曰有敢諫者死無赦伍舉入諫莊王左抱鄭姬右抱越女坐鐘鼓之間伍舉曰願有進隱曰有鳥在於阜三年不蜚不鳴是何鳥也莊王曰三年不飛飛將冲天三年不鳴鳴將驚人舉退矣吾知之矣居數月淫益甚大夫蘇從乃入諫王曰若不聞令乎對曰殺身以明君臣之願也於是乃罷淫樂聽政所誅者數百人所進者數百人任伍舉蘇從以政國人大悅按楚王之淫樂不聽政乃術也彼

陰以此別其臣下從吾於樂又從而諂諛之者不肖人也苦口力諫者賢臣也故一朝聽政所誅者皆不肖所進者皆賢誅進以數百計而無過舉焉齊威王之烹阿封墨亦然余故謂殷高宗之二年不言與楚莊之二年不聽政其所操王霸之術不同而其用意相似不然此三年之久以亡國有餘矣

同爲人子也伍胥走以報父讐伍尚死以殉之同爲人臣也鄆公弟欲殺昭王以報父讐鄆公以身事之同爲

人友也專諸刺王僚以成伍胥之伐楚申包胥哭秦以  
攻之包胥吾無議矣尚正也胥權也鄢公欲爲胥而不  
能者也父死不能報仇仇之子蒙難過之而欲割刃焉  
非勇也鄢公之弟矯其兄而甚焉者也無爲戎首不已  
多乎奈何其以身事之也若專諸者小人之雄刺客之  
靡好勇而不知義者也

楚王郢敖名員子胥亦名員郢敖之後爲靈王靈王之  
後爲平王子胥平王時人相去不遠而犯郢敖名何也



如以楚蠻夷無諱則前此晉靖侯名宜曰而周平王亦名宜曰是君同臣名也穆王名滿王孫滿亦名滿是臣同君名也豈世次稍遠便不復諱耶

越世家

句踐反國七年拊循其士民欲用以報吳大夫逢同諫曰國新流亡今乃復殷給繕飾備利吳必懼懼則難必至且鷙鳥之擊也必匿其形今夫吳兵加齊晉怨深於楚越名高天下實害周室德少而功多必淫自矜爲越

計莫若結齊親楚附晉以厚吳吳之志廣必輕戰是我  
連其權三國伐之越承其敝可克也按同言乃合縱之  
計也但不以此爲名陰用之耳其後吳與齊晉爭伯兵  
連於外輕銳盡死越乃乘虛入之同之言無一不驗可  
謂奇計矣乃不發於種蠡而發於同越多才如此豈可  
辱乎

三家滅智伯燕昭破齊湣亦合縱也漢王破項羽但以  
已綴其兵而已不與力戰而韓彭英布輩掎角撓之亦

合縱也吳蜀之得以抗魏亦合縱也小弱敵强大千古不外此法

趙世家

穆王西巡狩見西王母樂之忘歸譙周曰余嘗聞之代俗以東西陰陽所出入宗其神謂之王父母或曰池名在西域有何據乎徐偃王反穆王日馳千里馬攻徐偃王大破之譙周曰徐偃王與楚文王同時去周穆王遠矣且王者行有周衛豈聞亂而獨長驅日行千里乎此

二說並言其事非實也夫荒忽之事固不可以意揣然大約秦以前事自六經以外雖左氏不無浮夸況其他乎秦火之後購書爲難故漢初僞書雜出多繇閭閻小夫肆其狡獪而學士不察雖堯幽囚舜野死太甲殺伊尹亦信爲實然良可歎也

趙武靈曰服奇者志淫則是鄒魯無奇行也俗辟者民易則是吳越無秀士也奇行之奇言放僻也苟服奇而民志即淫則鄒魯章縫便可以此必其無奇衰乎苟俗

僻而民行皆陋則吳越文身便可以此必其中無秀士  
乎語意如此索隱訓鄒魯好長纓爲奇服夫冠之有纓  
法服也何奇之有

主父胡服騎射與公子成趙文等議論其辭雄俊博辨  
勢如河決當其將三軍攻中山懷地北至燕代西至雲  
中九原欲從雲中九原直南襲秦乃詐自爲使者入秦  
欲自略地形因覲秦王之爲人也此其膽志才略豈特  
兒視六國諸君而已哉雖以秦政方之蔑如也使主父

不死縱不能取秦亦當與之更相雄長如秦繆晉文之時而六國倚以自固則可以不爲蠶食彼衡人齷齪安所施其謀乎主父之失在於令弱子治國而身略地於外彼公子章之能亂日侍其側而不知肥義非應變之才又使之輔其弱子謬矣又欲分趙以王公子章猶豫不決而沙邱之變起矣自古雄傑非常之主經營四方而內忘其肘腋之禍皆不知大道故也吾感主父之事益嘆聖賢修身齊家窮理知人之學萬萬世不能易也

肥義者趙武靈王之先世貴臣而武靈以六尺孤付之者也公子章與田不禮之將爲變也李兌以下皆知之義亦自知之事固有大於此者乎義盡言於武靈亟去田不禮而以他人代之羽翮既鍛凶謀自寢此上策也不然則將順武靈之旨亟勸其封章於代而徐爲之圖可也又不然則請於主父以盜賊出入爲辭析符爲驗此後主父召王合符則往不合則不往亦妨奸之一法也今義不告於主父徒與信期輩私憂竊嘆其慮奸人

矯命召王不過以身嘗之而已卒之身死而禍不得弭  
豈非不善處死之故哉夫肥義爲主父信臣言之未必  
不聽即不聽亦當致位而去授政能者未必其不能制  
章也計不出此遂使沙邱之禍主父父子俱死豈不惜  
哉彼惠文王之不死特偶耳嗚呼吾讀史得二人焉晉  
荀息趙肥義皆守咫尺之義而不知大道者也

魏世家

新序云文侯師子夏友田子方敬段干木此名之所以



過於桓公也卜相則成與璜此功之所以不及五伯也  
余謂戰國之主賓友賢士者皆以爲名而已彼以賢人  
君子之言爲迂緩不切於用而猶欲藉其名以震曜鄰  
國故厚爲禮貌而不委以事權也夫文侯過矣而國家  
待浮名之士則當參用其法如諸葛亮之於許靖是也  
晉之於殷淵源唐之於房次律皆怵其高名置以台輔  
事安得不敗乎

韓世家

趙魏攻我華陽韓告急於秦秦不救韓相國謂陳筮曰  
事急願公雖病爲一宿之行陳筮見穰侯穰侯曰事危  
乎故使公來陳筮曰未急也穰侯怒曰是可以爲公之  
主使乎夫冠蓋相望告敝邑甚急公來言未急何也陳  
筮曰彼韓急則將變而他從以未急故復來耳穰侯曰  
公無見王請令發兵救韓八日而至策士遊說之言蟬  
連不竟欲其意之達也此獨三言而畢穰侯已立發兵  
矣談言微中可以解紛豈不善哉因此悟文章家操筆

執簡有纚纚千言究其實不如數語者詩人鋪張物狀作帝京篇長安古意而言盡意餘有不如五七言一小絕者無他指事切情入人胸膈故也

田敬仲完世家

取我田疇而伍之取我衣冠而褚之鄭人之謗子產也大臣之謀國也先威而後惠威折則惠不孚矣德施人之所以欲君其行之刑罰人之所惡臣請行之田常之欺齊侯也奸臣之竊國也先惠而後威惠結則威不怨矣

諸葛武侯蜀之子產乎司馬仲達魏之田常乎

孔子世家

甚矣王安石之愎而不通狠而不遜也孔子適魯適衛  
齊宋鄭陳蔡此以何爲哉而安石曰烏在其爲行道太  
史公作孔子世家附諸侯國之後此特筆也孔子龜蒙  
布衣據魯親周使列之本紀則非其心也然而大聖人  
梗概又不可夷於列傳故特爲世家以抗之當西漢儒  
風尚徵黃老恣橫之日太史公能尊尚孔子不遺餘力

如此豈非豪傑之士哉安石乃曰處之世家仲尼之道不從而大置之列傳仲尼之道不從而小甚矣其悞而不通狠而不遜也

陳涉世家

三國時人謂劉玄德能亂人而不能治觀陳涉吳廣輩舉事草草軍無紀律涉所遣諸將徇地者輒反他所吳廣爲田臧所殺勝不能討因而將之所信用朱房胡武皆小人無識者以至人情不附六月而敗蓋勝本庸材

初不能亂人者也以秦之虐百姓人人思叛獨難其首  
事者會勝攘臂一呼不覺響應耳太史公稱其所置遣  
侯王將相竟亡秦蓋時勢使然初不繇勝蓋勝生而稱  
王死而有謚久而血食於碣幸矣抑亦人心惡秦之故  
而不忍死勝哉

外戚世家

太史公外戚世家首論三代廢興皆本女德而歸之於  
命今以其世家中所載諸后考之信矣其爲命也吕后

取張敖女爲孝惠帝后愛之欲其生子萬方而終無子  
命也高帝崩諸御幸姬戚夫人之屬呂后皆幽而殺之  
獨薄姬以希幸故得出從子之代文帝立遂爲太后亦  
命也竇太后始以良家子當賜諸王爲家在清河趙近  
家請其主遣宦者吏必置我籍趙之伍中宦者忘之誤  
置代中姬涕泣不欲往強之乃行竟爲文帝后亦命也  
王太后已嫁金王孫生一女其母以卜筮當貴奪之金  
氏怒而內之太子宮太子幸之太子者景帝也後遂爲

景帝后生武帝亦命也衛子夫爲平陽主謳者武帝過  
主主盛飾良家子十餘人見帝帝弗悅既飲謳者進上  
望見獨悅子夫幸之遂入宮爲皇后亦命也寵辱推遷  
禍福倚伏當其賤也塵埃不足以喻其微及其貴也天  
霄不足以喻其達雖萬乘之君愛憎予奪且莫能自主  
也而況下之者哉信矣其爲命也

荆燕世家

田生受營陵侯澤金陰爲設謀令其子事呂后所幸大



謁者張卿說其順呂后意立呂產爲王以爲張卿功產立呂后喜生乃復說張卿令說呂后立營陵侯澤太后從之乃立澤爲瑯琊王田生勸澤急行毋留出關太后果使人追之不及按當時吳楚齊代諸王皆就封在國澤雖不出呂后亦不能盡滅劉氏而呂產既王幾亡漢室田生此謀所以爲澤則善矣爲漢則我不知也

蕭相國世家

高帝多封蕭何故欲首其位次以羣臣推曹參無以難

之得鄂君明其功乃定及後帝以何爲民請苑械繫之  
得王衛尉明其無罪乃釋此兩人皆有功於何者然爲  
鄂君易爲王衛尉難鄂君當分封時已知帝旨在其  
言雖當阿帝意也衛尉進言在帝盛怒時使小人自爲  
功名媒孽人短則一言之下何爲齏粉矣今衛尉能反  
覆明其無罪又譏帝之失真骨骸臣也鄂君卒以得封  
而衛尉不聞受賞帝於直言蓋勉強從之者歟

蕭何素不善曹參論相則以參爲可此何之所以爲賢

也曹參素不爲何所善爲相則一遵何法此參之所以爲賢也

十八元功位次蕭何位第一而其封止八千戶曹參第二而萬六百戶尊何之位所以重謀臣也廣參之邑所以厲戰士也

留侯世家

子房以五世相韓故破產報讎既乃說項羽求韓諸公子橫陽君成立之爲韓王矣然當其以太公兵法說沛

公沛公善之嘗用其策良爲他人言皆不省曰沛公殆  
天授此時已心歸沛公矣彼韓王成者泯泯無所表見  
良豈不知其不足以取天下哉是故橫陽既立良仍從  
沛公入定關中及羽將擊沛公於霸上良周旋項伯項  
王亞父間不顧危死沛公主漢中良送至褒中勸其燒  
絕棧道以固項羽心又說項王曰漢已燒絕棧道無還  
心矣乃以齊王田榮反書告項王項王以此無西憂漢  
心而發兵北擊齊此時韓成固在也而良無一不爲漢

王者或謂成未死以前良爲韓既死以後始爲漢豈其然哉計成即不死良從之國亦不過教以自固一方保韓血食而已至取天下之圖終以屬漢良必當爲漢外應舉兵撓楚如彭越之往來梁地燒楚積聚也

留侯招致四皓以輔翼太子自楊維禎及胡儼王守仁皆謂四皓隱者不可得致良因高帝所素重遣人僞飾以誑帝也余讀之笑曰是何待四皓之深而待高帝之淺哉彼高帝越國而知栢直馮敬之能否前數十年而

知吳王濞之將反此其知人之明不既高出千古哉使  
良遣人僞爲四皓不過偉其衣冠敏其應對而已而其  
真僞終不可掩事一敗而太子無完理矣彼四皓者特  
戰國豪傑之士田光先生之流耳意氣刎頸固其常也  
以高帝嫚罵輕士故不至以太子卑辭安車故至無足  
怪者且以帝所至敬無如子房其次則叔孫通又其次  
則周昌也三人反覆言之而不聽而四皓回其意於立  
談之頃此豈徒以其名哉劉曄有言對雄主非精神不

接四皓之精神固有以接帝也三子之論謬矣

帝遣太子將兵擊英布即晉獻公遣申生伐翟之意也  
有功位不益無功則受禍四人策之如指掌豈亦僞爲  
者能如是耶太史公紀四皓說建成侯纒纒數十言使  
書策不可信則并不信有張良畫策事可也疑四皓非  
真則不可也

良數以太公兵法說沛公沛公善之嘗用其策良爲他  
人言皆不省良曰沛公殆天授後分封時帝使自擇三

萬戶良曰始臣起下邳與上會留此天以臣授陛下留侯始終自負如此孰敢以爲大言哉若曲逆侯則不然曰非魏無知臣安得進良平之高下於此可見

或問張良椎擊始皇博浪沙中誤中副車大索十日不得豈有術與曰非術也秦法太重秦虐太深天下之人重足側目久矣彼始皇直孤立耳當秦滅魏時購求張耳陳餘耳餘乃爲陳里監門反以其名令於里中耳餘且不可得況子房哉漢武任酷吏作沉命法曰羣盜起



不發覺覺而捕弗滿品者二千石以下至小吏主者皆死其小吏畏誅雖有盜不敢發恐不能得坐累府府亦使其不言上下相爲匿重誅之不足以督奸如此

絳侯世家

絳侯條侯皆以大功臣下獄絳侯免條侯不免者絳侯以益封更賜盡予薄昭薄昭爲言薄太后太后以冒絮提文帝明絳侯不反而條侯在七國反時以漢婁吳楚爲梁王所怨重以沮王信封廷竇太后安得不死哉嗚

呼掃膏棘軸所以爲滑也然而不能運方穿淳于髡之  
所以教駟忌也吾因條侯事爲之三歎

管晏列傳

管子立政盡於與俗同好惡一語晏子立朝盡於節儉  
力行一語

老莊申韓列傳

太史公曰世之學老子者則絀儒術學儒者亦絀老子  
道不同不相爲謀按儒之爲道内外合者也老子有内

而無外者也是二者皆有竊焉而人之竊老也易竊儒也難今夫儒之爲學有仁義以本之於內有禮樂以制之於外故不仁不義則非內也無禮無樂則非外也內是而外非則并非其內也外是而內非則并非其外也夫惟合其一而離其一者之不可以爲儒故人之竊之也難若夫老子之道則曰無爲自化清靜自正而已而其所以用世之具略而不言若曰世有得吾意者則可以自合耳此猶廣廈數十虛其半而不居則庇其廊廡

者至矣是故申韓之刑名托之良平之權謀托之漢文帝之恭儉托之曹相國之儻蕩托之汲黯之強直托之田叔之長厚托之鄭當時之任俠托之白圭之貨殖托之其餘爲此學者林立蠡起不可勝數而行事無一相類者則以老氏未嘗爲之外也雖然老子之學陰主於爲我故竊之者多沉刻靜悍之士濡柔謙下欲取故子以濟其所欲蓋其體與用皆托於不可見故人之竊之也易嗚呼昔之人竊其易今之人竊其難難者終不可

竊也則禹步舜趨自命曰儒者儒者固如是哉

韓非李斯孫臏龐涓蘇秦張儀龐煖劇辛或同師或同  
學或同遊相善而皆示智相激以成其妬媼之私斯讒  
非而殺之煖敗辛而殺之涓誘臏而刑之臏又誘涓而  
殺之秦激儀而用之儀又短秦而反之此數子者大約  
傾危之士哉獨煖之殺辛各爲其主而辛以輕煖見殺  
煖差無罪然凶終之禍此爲極矣吾是以嘆管鮑之實  
絕千古也

伍子胥列傳

程篁墩以子胥報讐爲處變之定理而責其入郢之後不能投戈解甲辭吳歸隱何燕泉則以太子建固子胥之君也則從出亡建爲鄭所殺子胥當於入郢之後伐鄭以報讐如此則忠義大著可以塞宰嚭之口卻屬鏤之劍余謂兩公之論非也夫子胥乞食江上幾死昭關一亡虜耳藉吳之力以報其不共戴天之讎讐既雪矣德獨可無報乎投戈解甲辭吳歸隱是可以報吳之德

乎太子建出亡在鄭鄭人善之建乃甘心爲晉外間欲以滅鄭求封故定公與子產誅殺建其罪當矣即子胥力能伐鄭義且不可況不能乎吾故曰二公之論皆非也

商君列傳

施伯勸魯君殺管仲魯君不從而桓公卒相仲以伯齊齊霸而魯益衰公孫痤勸魏王殺商鞅魏王不從而孝公卒用鞅以強秦秦強而魏益弱夫公孫痤將死之言

耳若施伯固在魯何其後竟沒沒耶將魯廢其言而亦  
不能用其人耶抑智足以知人而力不逮耶

白起列傳

白起爲秦大將連兵於外所屠戮以百萬計殺氣上干  
於天雖微應侯之譖豈得良死哉然其於秦則可謂有  
大功者秦負起起不負秦也方起始進有穰侯主之於  
內故得立功及范雎扼穰侯吭而奪之位則必以起爲  
穰侯之黨日夜慮其軋已者也不待蘇代之說而殺機



已發矣

孟子荀卿列傳

黃子讀孟子荀卿列傳歎曰太史公之尊孔孟闡儒術至矣漢人以孔子墨翟並稱而孟子者當世與說士並稱者也太史公出孔子之道始獨尊而孟子始得以繼孔矣此傳始孟子終荀卿中騶忌騶衍淳于髡慎到騶奭之徒錯見焉而其傳則以孟荀立名孟荀雖並稱而首引孟子書對梁王者先之且以夫子罕言利爲比傳

即繼之云受業子思之門人又云孟軻乃述唐虞三代之德是以所如不合又云序詩書述仲尼之意作孟子七篇則孟子之源流較然而此傳之爲尊孟子而作無疑矣其下述騶衍之術迂誕不經重爲時王所尊禮以見孟子言王道而所如不合乃有國者之醜也因復以仲尼之困陳蔡伯夷之餓首陽與孟子之在齊梁間爲比其嘆息爲何如哉繼又曰或曰伊尹負鼎而王云云非以美騶衍也太史公稱或曰者皆甚不然之辭觀封

禪書及他傳中可見也蓋當時之稱騶衍其論云云爾此下即接淳于髡數子之學術見時所尊尚不過此類而以荀卿終之荀雖非孟比然其所著書切於事理與騶衍等相反則已爲當世所絀廢死蘭陵矣如孔孟者又何望哉末後叙公孫龍等數家以見羣言散亂而孔孟之書足爲萬世法也太史公大旨如此其文捭闔不羈若滅若沒讀者類求之於筆墨蹊逕之內故雖以譙允南之精識而猶謂其好奇也人固難與知言哉嗚呼

黃老爭鳴之後不眩不亂毅然一之於孔孟豈非豪傑之士哉雖孔子世家仲尼弟子列傳中不無躊駁君子觀其大意可也

孟嘗君平原君信陵君春申君列傳

四公子之徒信陵君尚矣不可及已其次則平原君而孟嘗春申吾無取焉信陵之用舍去就魏之存亡係焉侯嬴畫竊符之謀毛薛陳歸魏之義此三人者皆天下奇士信陵能用之所以爲賢也平原才識達不逮信陵

其納韓上黨至使邯鄲受圍流血千里趙幾再亡國矣  
然而區區之心固存於趙也其從李同也有紓國之忠  
其釋趙奢也有改過之勇至於陷身虎口終匿魏齊不  
肯出壯哉烈士之風也春申納女以篡楚孟嘗助敵以  
傾齊一則身死李園一則子孫滅絕皆天道也世多馮  
煖收責及復孟嘗相位事然愚謂孟嘗與五國破齊時  
煖曾不能進一正言如毛薛之於信陵者其孜孜三窟  
小人之謀耳何遽出雞鳴狗盜上乎

孟嘗之才孟嘗之得士皆不下信陵也而其在國也專  
信陵不及也何以知其專也曰孟嘗入秦秦王欲相之  
既而因欲殺之孟嘗得以計免歸此於秦直私憾耳乃  
能以齊爲韓魏攻楚而因使韓魏攻秦且借兵食於西  
周是孟嘗之意不但能行於齊王而三晉亦且服之矣  
使信陵之在魏若此何至救趙之義舉久抑不行至竊  
符而後遂哉吾是以益嘆信陵不失人臣之大節而孟  
嘗惑於蘇代之言不果伐秦爲可恨也

四豪中相士之眼獨信陵爲最平原不能知毛遂孟嘗不能知馮驩春申不能知朱英雖取效不同其不知人一也信陵得一老監門尊爲上客於他國得一賣漿人一博徒步往見之卒用其力顯名諸侯而此三人者皆當世狎侮戲笑之餘也不知以何道得之相士若此雖取天下可也

如姬竊符舞陽奉使不見下落舞陽爲秦人所誅無疑太史公蓋不屑書耳如姬雖一女子能以報父讐故德

信陵君不愛一死可謂有烈丈夫之風矣不知魏王殺之耶抑赦之耶

范雎蔡澤列傳

秦之用穰侯也穰侯之舉白起也戰勝克敵拓地千里自商君以後功未有加焉者也應侯羈旅入秦所欲得者相位耳使其挾富強之說以與穰侯角是自困之道也計穰侯功大驕侈秦王以少主在位所忌聞者莫如太后之專權而穰侯爲宣太后弟太后在則穰侯不可



得去故并言太后以去穰侯此范雎之所以巧發奇中也然所言者人主骨肉之間故略見端緒久之而後敢發若蔡澤之於雎則不然雎已譖殺白起所任鄭安平王稽復敗秦王臨朝而嘆雎固日夜欲釋相位久矣然不得其人而釋之則雎不安得其人而釋之而不出於雎雎亦不安故雎姑俟焉及澤宣言將代雎位而雎召之故逆其旨厲其色以觀澤之能否而澤之所言皆足以中雎之疾反覆連辯而不爲屈則雎固深知其爲辯

士而可以動秦王矣於是言之秦王推之相位於已有  
避賢之美於澤有推轂之恩爲睢計者無出於此此澤  
之所以巧發奇中也

樂毅列傳

或曰樂毅破齊之事偉矣獨留莒即墨未拔夏侯太初  
以爲樂生方恢大綱以縱二城收民明信以待其敵王  
業可就不幸垂成而敗信有之乎曰樂生摧鋒乘勝盡  
下齊城至五歲後兵力倦矣強弩之末不能穿縞而即

墨則田單在焉莒則太子法章在焉田單死守即墨莒人共立法章爲王以距燕此二城之中人心皆有所屬非向者七十餘城之比故堅守不下耳豈樂生能拔而故留之乎曰使燕王不聽讒不以騎劫代生則莒即墨可下乎曰下之而不能有也齊自田常以來小惠之結於民者深矣湣王以兼并之故爲諸侯所怨而不聞有峻刑酷罰加於民者有士如王蠋尚能守死爲齊則民心固未盡忘齊也燕既并齊城拓地千里五國必將忌

之矣以復齊爲名一合而軋燕此勢之所必出也曰然則爲樂生者奈何曰破齊戮湣王屍求齊疏屬之賢者而立焉戮湣王則可以雪子噲之讐立疎屬則可以釋兩國之憾旋師而去燕其伯矣惜乎楚莊復陳之後數百年不聞此舉

廉頗藺相如列傳

趙使樂乘代廉頗頗怒攻樂乘樂乘走廉頗遂奔魏之大梁趙使趙蔥及齊將顏聚代李牧李牧不受趙使人

微捕得李牧斬之頗牧名將也將在軍君命有所不受  
苟利社稷專之可乎曰否君命有所不受者蓋指軍中  
之事有所誅殺避就而君從中制之則將守便宜可以不  
受也若孫武斬莊賈而景公赦之亞父以梁委七國  
而景帝督戰此可以無受也若將之用舍則存乎君矣  
易將而將不受是反也頗牧皆不知大義者也在戰國  
以樂毅爲正在後世以岳武穆爲正

田單列傳

田單之火牛妙在先有神師一著彼先聞神師之語以爲此即神助故大驚潰散耳若知其爲牛敵軍不懼矣後世有羣盜用火牛法拒官軍者以鎗中牛鼻牛痛皆反走觸賊賊遂敗

太史公叙王蠋事於田單傳後而以齊亡大夫感王蠋之死乃相聚如莒求法章立之是以齊存亡係於一布衣其尊蠋至矣但此傳止以田單立名而蠋若牽連得書者故秦少游譏之如曰田單王蠋列傳則大善矣

魯仲連鄒陽列傳

戰國士大抵皆爲秦用其始終擯秦者虞卿魯仲連兩人而已兩人皆居趙虞卿指畫秦人情僞如掌爲趙約縱於齊奪秦人之氣有功於趙甚大魯連不若也然虞卿所見止於一國而已魯連義不帝秦有儒者之風焉有天下之志焉虞卿不若也虞卿受萬戶印而能輕之仲連不受而逃之故後世獨稱魯連雖然聊城之書是亦不可以已乎奈何教人以反

鄒陽獄中上梁孝王書比物連類似從李斯諫逐客書  
脫出而言重詞複則過之蓋陽爲羊勝公孫詭所譖其  
人不可直斥故反覆曉譬期於梁王之自悟而已太史  
公以爲抗直不撓不過指其末數語篇中桀狗吠堯跖  
客刺由則以狗盜自比不亦甚哉以陽與魯連同傳此  
太史公之失也

屈原列傳

楚大國也秦王誑懷王以欲會屈平諫曰不如無行懷



王不聽卒行入武關秦伏兵絕其後因留懷王以求割地秦之得以執懷王者以其從行無人也趙國強大不如楚而澠池之會秦終不能有加於趙者以有藺相如在也揚廉夫責屈子以不能從行然屈子誠臣耳應變之才不及相如如往亦無濟也嗚呼往則危不往則示弱而卒保其君以返此相如之才所以爲大過人也儒者猶訾之不置其亦過刻矣

李斯列傳

秦未亡也爲秦滅六國者先亡矣造作陰謀遣人齎持  
金玉游說諸侯可下者厚遺之不則利劍刺之離其君  
臣之計者李斯也爲趙高所構卒具五刑家世爲秦將  
將三十萬衆北逐戎狄收河南築長城者蒙恬也與其  
弟毅相繼受戮爲秦大將拔趙破荆降魏定燕齊者王  
翦也幸獲首卹而其孫王離卒虜於項籍蓋秦以詐力  
取天下天厭其德故佐秦者無一得免耳彼周召之徒  
東德輔世者後裔延八九百年不絕善惡之報何如哉

李文饒論亡國之鬼神不平多出妖淫之色破人家國引妹喜驪姬等爲証余謂不獨此也又有佞巧之人焉秦滅六國趙高以趙氏疎屬得事始皇扶蘇胡亥皆死其手秦之公族大臣名將爲所誅殺略盡而秦遂以亡是亦女戎之類也語曰亡秦必楚吾謂趙亦有力焉

張耳陳餘列傳

張耳陳餘皆反覆之士也當其佐陳涉欲王楚耳餘以爲示天下私不可及從武信君下趙則又勸其自王以

填趙何相背之戾也鉅鹿之事耳責餘以必死及相見時遽收其將印此耳過漢東擊楚使使告陳餘欲與俱餘要以必殺張耳此餘過及耳從韓信擊斬餘泚水上至并殺其故主趙王歇則耳罪之大者也刻木爲人而拜之猶不可以析而爲薪況所常北面事之者乎始以趙王歇被圍之故責餘以死既乃以惡餘之故并殺趙王歇何相背之戾乎論者止以張陳凶終爲口實而不及耳之殺歇甚矣君臣之義之不明於亂世也

黥布列傳

布所幸姬疾云云至布使人追不及按責赫即無奸狀亦自可殺蓋事左右求容此齊威之所以烹即墨也布無術學當斷不斷反受其亂雖然布不足惜也爲項王擊殺義帝死有餘辜矣

薛公策黥布三計桓譚譬之於奕以取吳楚并齊魯及燕趙爲廣道地之謂以取吳楚并韓魏塞成臯據敖倉爲趨遮要爭利之謂以取吳下蔡據長沙以臨越爲守

邊隅趨作罽之謂論甚善然據敖塞成臯此在楚漢  
爭衡爲上計而於布反爲中計何也蓋此時漢之大勢  
已定不可以巧襲而力爭也故當以游兵略地以示進  
取得寸則寸得尺則尺而於漢所必爭之地則謹避之  
也若漢之取秦唐之取隋皆直走關中者秦隋根本之  
地皆虛也經營天下各有時勢不可執一如此

淮陰侯列傳

高帝之於韓信未嘗親見其狀貌熟察其計畫以蕭何

一言之故遂拜爲將將又不足而至大將此類兒戲然  
卒用此得天下何也蓋帝不知信而知何以何之不安  
而知信之可用也圖天下者豈能人人耳而目之哉得  
數人可信者足矣

韓信謂漂母曰吾必有以重報母母怒曰大丈夫不能  
自食吾哀王孫而進食豈望報乎詳母怒信之意蓋謂  
其落魄至是雖自食且不能豈有富貴之日我但憐汝  
故食之若云相報知汝不能也後人誤看至謂漂母有

眼當與黃石老人同類而稱則失太史公意矣大抵太史公於英雄貧困失路無門之日皆極力摹寫發其孤憤如蘇秦張儀皆見笑於其妻陳涉見笑於耕者陳平見笑於其嫂黥布見笑於時人此類甚多至漂母飯信而不望報是以信爲溝壑也其意益深痛不忍讀矣後信就封至楚召所從食漂母賜千金不聞此母卻之則其非異人明矣

諸葛武侯出師表有云苟全性命於亂世不求聞達於



當時余嘗歎息其言此潛龍之學也人固有徒步取將  
相提百萬衆呼吸雷風而不能全其性命者如韓信未  
遇時凡歷數死乃食淮陰則可以餓而死少年侮之則  
可以鬪而死亡楚歸漢則可以亡虜死至連敖坐法兵  
在其頸矣屬有天幸遇滕公故得不死非信之能自必  
其不死也而功成之後卒以反死嗚呼性命之於人甚  
矣哉非大賢亞聖其孰能全之

龍且爲楚將陳平以骨骭臣稱之以善戰如黥布而且

能擊破布計其人亦非淺淺者囊沙之戰且以輕信被殺耳使信威望素高且有畏心堅壁清野持牢不戰信未必不坐困也秦人伐趙戒士卒無得泄武安君爲將者卒殺趙括坑士四十萬有以夫

張丞相列傳

張丞相傳筆法甚奇因蒼嘗爲御史而周昌趙堯任敖曹窋皆以嘗爲御史大夫故牽連得書本傳以蒼起以蒼結一傳中包數小傳統看又仍是一傳蒼傳後係以

申屠嘉事見漢相如嘉者即不可多得也然嘉非完人以才能忌晁錯欲生端誅之至反爲所賣故贊語以無術學少之而其題止曰張丞相傳

酈生陸賈列傳

陸賈服儒之服言儒之言而其全身遠害排難解紛功立而無可指名事成而不爲權首則似深於黃老之學者特外以儒術文之耳賈素善辟陽侯乃勸辟陽侯交朱建者蓋心知辟陽侯所爲不法禍將及已故嫁之於

建也及孝文誅辟陽客以建嘗爲畫策捕治之建遂自  
頸而賈獨全此則學黃老者之微巧也先輩多謂陸生  
有功儒術恐非至論

劉敬叔孫通列傳

婁敬言都關中之利甚至而高帝以羣臣言疑未能決  
及留侯明言入關便即日車駕西都關中帝之從留侯  
如此當在秦宮中時樊噲諫帝急還霸上帝亦不聽噲  
而聽良夫噲與敬之言皆與良無異兩人又先發而帝

必欲決之於良帝與良固終身以之者也明於擇人而簡於應事真帝王之略哉

袁盎晁錯列傳

賈誼之絀也以絳灌晁錯之死也以竇嬰微嬰袁盎固不能殺錯也貴戚大臣之足以操人寵辱生殺之權如此

張釋之馮唐列傳

文帝與馮唐論頗牧之事唐謂帝雖得頗牧弗能用上

怒起入禁中良久復出召唐使畢其說唐不過一白首  
老生耳乃於衆中面折人主人主虛顏受之如朋友之  
間相與詰難反覆者且唐之意在發明魏尚無罪使在  
後世必疑其爲尚私人不惟言不見用身且得罪矣今  
文帝乃即日令唐持節赦尚推此類也左右近習豈能  
蔽之哉蓋漢初懲二世深居之蔽故天子與小臣親近  
如此是時袁盎張釋之輩皆得出入禁中而盎至引卻  
幸姬之坐則漢以後不復有此事矣非無盎也無文帝

親近小臣也嗚呼君臣隔絕則君益尊臣益卑雖開之使言而不敢盡其說天下之不治皆坐此哉

萬石君張叔列傳

萬石君門德可觀而建慶輩立朝獨無矯矯風節使當患難固發蒙振落之類耳魏之王祥吳之孟宗皆稱純孝而於國事獨無匡救皆萬石君類也衛綰婦女之簡桺直不疑道家之小數周文佞倖之氣態雖高下微分君子不取獨張歐以忠厚濟景帝之綜核其庶幾乎

田叔列傳

梁孝王使人殺吳相袁盎景帝召田叔按梁云云田叔  
於此可謂善處人骨肉之間矣然國之所恃以立者法  
也梁王親使人賊殺天子之謀臣而以太后故置不問  
則法亡法亡則國削夫梁王在議親議貴之例可以無  
誅而王之幸臣公孫詭羊勝之徒實導王爲邪不可以  
不殺殺勝詭以塞天下之怒而貫梁王以安太后之心  
此法意也田叔盡燒獄詞一切不問雖號知大體者而



於處事未爲盡善善夫韓安國之說孝王出勝說也微  
安國則景帝母子兄弟之間不全

李將軍列傳

李廣非大將才也行無部伍行陣不擊刁斗人人自便  
此以將數千騎逐利乘便可耳遇大敵則覆矣太史公  
叙廣最得意處在爲大郡太守以百騎遇匈奴數千騎  
射殺其將解鞍縱卧然此固裨將之器也若夫堂堂之  
陣正正之旗進如風雨退如山岳廣豈足以與乎此哉

衛將軍將數萬騎蹂躪邊廷未嘗挫衄其將略優於廣  
遠矣且出雁門時廣所將萬騎乃爲敵所得而霍去病  
以八百騎斬捕過當必謂廣數奇而去病天幸恐非論  
之得平者也淮南王謀反止憚青與汲黯而不聞及廣  
太史以孤憤之故叙廣不啻口出而傳衛將軍以姊子  
夫寵幸若不直一錢者然隨文讀之則廣與青之優劣  
終不掩

平津侯列傳

主父偃言九事八爲律令其八不傳而其一爲諫伐匈奴引秦皇高帝之失策而推之於虞夏商周其文辭甚美然至進身之後則又盛言朔方之便以難公孫弘上從其言竟立朔方郡是其與先資之言蓋不啻枘鑿而矛盾也然偃也行之不疑而武帝不以此疑偃公孫弘不以此詰偃何哉蓋帝之初用偃不過喜其文辭而於窮兵黷武之失未嘗有悟及偃窺帝意竟以置朔方之便迎之則帝固樂其合已而忘其前言矣弘非辯不足

以詘偃蓋知帝意已堅則詘偃適所以忤帝故佯爲不勝以從之也嗚呼佞邪之臣敢爲誣罔如此

汲鄭列傳

武帝之知汲黯至以古社稷臣許之其敬禮黯過于丞相弘大將軍青遠甚然黯之言無一用者黯廷斥公孫弘張湯而天子愈貴幸弘湯黯言與胡和親無起兵而天子欲征匈奴黯言勿以渾邪王故誅當死者五百餘人上默然不許及其後棄之淮南黯遂爲諸侯相終其

身然張湯之誅天子聞黯嘗勸李息發其罪而息畏湯不言遂按誅息則又未嘗不思黯言也如武帝者可謂善善而不能用了矣原黯之廷帝有三曰數直諫也曰褊心怨望也曰帝好儒術黯好黃老也此三者之中惟怨望則黯失也

酷吏列傳

酷吏傳以郅都爲首都公廉有節槩其不從景帝救賈姬事雖汲長孺當此不是過也爲治雖先嚴酷然能擊

強宗未可竟謂之酷吏惟其扼臨江王於垂死之時不予刀筆作書則其用心過忍而處人父子之間亦達媿田仁矣且臨江王爲太子以母栗姬失寵故廢非有悖逆不道也而都禁切之如此者所以阿帝意也卒爲竇太后所怒中危法死都固有以取之哉權文公至謂都剛而無虐怒而中節吾不敢以爲信

臺諫者權臣之鷹犬也酷吏者人主之鷹犬也夫權臣假臺諫以擊去其所不快者莫甚於宋之秦檜韓侂冑

而人主假酷吏以箝制天下者莫甚於漢之武帝唐之武曩帝外事四裔內興土木使海內蕭然繁費盜賊四起而帝又不能無事於興利也故怵民之不服而不得不用張湯杜周之流武曩以女主篡唐多行不義故怵民之不服而不得不用周興來俊臣之流彼湯周之酷所以調武帝而興俊臣之酷所以調武曩也嗚呼人臣以阿諛順旨之故至於賊殺不辜塗炭天下則其處心積慮爲何如哉然漢唐酷吏非刑死即族誅天道之於

人亦不遠矣

大宛列傳

張騫爲漢使留夷中十三年歸不失漢節視蘇武少六年耳匈奴與妻有子亦與武相類然天子意在開邊而騫以郎應募奉使君子所不爲也其言大夏可通又以失侯故欲連烏孫斷匈奴右臂以爲己功名之地自是妻烏孫取宛馬迄無窮歲則固蘇武之罪人也雖隕首邊廷亦不得與武比節况生還哉雖然騫有賢孫猛武




之後反無聞焉何也

太史公自序

世多謂太史公序六家要指進道德而絀儒術余按此  
非遷意乃述其父司馬談之言也遷進孔子於世家退  
老子於列傳左儒右老一覽可知今述其父談之言乃  
獨推道家者蓋談本學黃老此論必其精神所寄遷不  
敢沒故謹識之爾若其與上大夫壺遂相答問語發明  
六經大旨隱然欲繼春秋於五百載之後豈絀儒術者

之言哉且其言曰余聞之先人曰伏羲至純厚作易八卦堯舜之盛尚書載之禮樂作焉湯武之隆詩人歌之春秋采善貶惡推三代之德褒周室非獨刺譏而已也是談於六經之旨亦非牴牾者其謂儒者博而寡要勞而少功蓋是指當時俗學之弊耳以辭害意雖班固且不免况其他哉



陶菴全集卷四